

四庫全書

集部

欽定四庫全書

集部

文憲集卷三十

詳校官中書臣吳璫

中書臣劉源溥覆勘

總校官降調編修臣倉聖脉

校對官編修臣章宗瀛

謄錄監生臣曾鏞

欽定四庫全書

文憲集卷三十

贊

凡三十
九章

文右相像贊

才優德純山峙玉溫重厚可以鎮俗仁恕足以澤民或
陳經術而侍青坊或秉霜簡而立紫宸終受知於聖主
宅右揆而相秦深沉有謀真潞國之裔剛毅忠信誠絳

明
宋濂
撰

侯之倫觀其屹立不動正笏垂紳猶可作懦夫之氣而
褫邪佞之魂嗚呼此所謂邦家之重寶廊廟之大臣也
歟

婁貞公贊

原武婁宗仁當天后政嚴之時獨以寬厚聞其弟守代
州宗仁教以唾面自乾至今為善者師焉因贊之以自
勗贊曰

我言之忸斯辱之招我行弗足或貽其辱二者無失其

至由外內省不疚我則何罪我面彼唾乃彼之愆我何
潔之正使自乾孰忿自乘攘袂而閔孰量之弘受詬如
頌是非苟繆不亦殆而微公之師吾誰與歸

陸秀夫像贊

身抱龍髯兮眼不見水鳳闕雖遐兮龍堂則邇玉雪皦
如肯汚泥滓赤日出海兮爾心不死

滕奉使贊

齊人王蠋有言曰忠臣不事二君烈女不更二夫女之

從人一與之醮當終身不改譬之白璧小有玷辱人將
斥去而不之顧臣之事君也其理亦同故蠲特並言之
事兩夫者雖辨如虞姬智如鄧曼吾知其決非良婦事
二君者雖功如汾陽才如西平吾知其決非良臣嗚呼
使此義昭如白日人臣安肯懷二心而國安有喪亡之
禍哉東陽滕茂實當宋靖康初以太學正與僉書路允
迪奉使於金議割三鎮太原尋奉密詔據城不下金人
怒囚之雲中欽宗北遷茂實謁見涕泣請從行主者不

之許其後允迪南歸茂實獨留雁門終身不再仕臨沒
令以黃幡裹屍而葬仍刻石識云宋使者東陽滕茂實
墓此殆不事二君者歟當是時有宇文虛中者亦以黃
門侍郎使金見留遂改節易行反面事讐其後雖欲奪
兵仗南奔而自贖卒亦不逃君子之議其視吾茂實果
何如也茂實已矣人至今想其遺節如神龍不可得見
至視虛中輩不啻若鬼域犬豕有識妄婦亦羞聞之此
無他人心天理終不可誣也乃作滕奉使贊用規事君

而有二心者贊曰

漢有蘇武奉使不屈滕公配之有聲烈烈黃幡裹屍以
全臣節如璧之白弗縉弗缺其人雖亡而神不滅上游
帝所凌厲日月降臣見之肝碎膽裂敢述贊辭勒在貞
碣

東陽十孝子贊

十孝子者皆東陽人其事載於郡乘為詳予讀書之
暇因採其昊天罔極之思而為是贊以風世之為人

子者

秦顏烏

東陽人

古有醇孝厥姓惟顏父喪未葬行泣道間我畚我鍤是
藟是瘞彼羣烏何知銜土予助我冢既封烏吻血流感
爾異類愧我同儔秦風日漓借耰鉏而德色誰意露雲
之四蒙見此皦日千載之下禮憲淪胥豈獨愧君烏亦
不如有廟嚴嚴春秋是祀用興薄夫作孝子

吳斯敦

東陽人

有孝者斯峴山之阿父罪當誅兒心奈何自非吾親盍
從生我我寧隕身父死其可九關戕戕虎豹斷斷泣血
上書願易以身王用爾恤卒全父命更旌爾門風彼不令
池波奔淪牢木扶疎清風肅然過者下車

晉許孜

東陽人

嗟嗟許生實孝于親胡風木不停遽此難屯輶車既載
負土築墳我親我璫敢曰勸彼鄉民手胼足胝我不為辛
巾笥猶存几筵不改惕然念之吾親何在秋霜凝凝春

雨濺濺父兮母兮得母苦寒與飢兒既不可見寧不念
茲天高可極此情罔極鹿獨不閔我觸我松柏嗟嗟許
生屬志不移終身之慕於子見之

唐馮子華

東陽人

緬彼孝馮綰廬墓傍思親不見欲與俱亡白月寥寥悲
風四起蒲伏號呼哀徹心髓天錫嘉瑞慰我孝思有鰥
斯免有斐斯芝孝馮曰噫吾焉用汝九京莫興百瑞奚
補唯爾孝子樹我世防雖歷萬祀厥德彌章自公之亡

肖公者幾茫茫堪興孰非人子

唐應先

東陽人

卓哉至行衆人所難眷我應君杖涕汎瀾親之云亡中
心咽塞雖草生髮間何暇束櫛昔處膝下其樂泱泱今
我來思舉目但見白楊彼蒼者天曷不我惻苟可從之
我生奚恤爾心之苦爾行之優雙闕戢戢卒承天休

唐唐君佑

東陽人

唐氏之子以孝行聞死生一節弗岐弗分唯思親不置

鞠明究臙誰無父母以樂以愉今我何罪獨行次且我
罪之深我宜隕墜胡獨使我親先彼朝露昊天不弔直
至于斯渺渺音容如何勿思官用褒旌封闕在舍匪私
爾一人式勸來者

陳太竭

浦江人

浦內之間有氏曰陳親沒居廬喪麻終身心勦形瘵杖
而後起一氣如絲去死無幾朝哭如吞莫哭尤不忍聞
松風翛翛林鳥嘒嘒來助予之悲號遐思弗寧起奠我

爵果有在前烏鳥為之不啄世瀦失防頰波滉瀟我思
古人古人焉往

宋董少舒

蘭溪人

有倬董君父以令終躬負厥土馬鬣其封四郊無人夜
寒如水黑飈潛興如臨神鬼董君出廬擁墳撫膺念父
寥寂長哀無聲日兮月兮能照下土寧不閔我最苦願
亟入九泉奉我父母靈芝煌煌駿發爾祥蓋紫幹黃於
燦其光有焯董君德聲斯不亡

宋金景文

蘭溪人

潞水之州三山之坡下有孝子孝如之何父疾在首顙
天請代願萃予身我親罔害母棺未窆執鑿以前天光
下燭五色粲然五色粲然未足為偉怪電獐風勿犯其
里苟匪中忱曷以臻此縣代是師於戲孝子

宋賈南金

金華人

孝道之弘百行所生誰與賈氏實敦古風生弗離親歿
安可棄忍令親之玉體為泉扃所閤畫雖不可見接以

夢寐夢中相見宛其未死覺後求之寒燈在几得不慨
茲潛潛墮淚睠爾孝德閱我章逢梔蠟其貌黼黻其躬
父子相軋或不相容我述贊辭用發民衷

許魯齋先生贊

濂洛之學傳自武夷重徽疊照日星昭垂逮我許公尊
聞行知若親樞衣寒泉之麋張皇幽眇釐析毫絲如臯
陶淑問畢其情辭如后羿注矢不失其馳既入閭域遂
升堂基橫經冑監衿佩鏘如祛其人私牖其天彝釋其

偏岐挽其九衢德成財達昭用如時黼黻帝治甄陶泰
熙明體適用公實庶幾無德弗報四海祝尸嗚呼許公
百世之師

劉靜脩先生贊

先生之心嶽鎮川澄先生之操玉溫石貞先生之學寤
寐六經岐陽之鳳魯郊之麟和氣襲人盎然陽春發周
孔性情挹其深醇或出或潛與道周旋九原可作吾為
執鞭

吳草廬先生贊

紫氣蟬聯神物蜿蜒有開必先山川降神自元而貞篤
生哲人慎斯勤斯絕乎等夷於道早知厲如秋霜煦如
春陽何德之昌抱膝而居氣蓋八區闕而弗舒玩心神
明操觚弗停輿衛聖經學徒是依毛之有麟甲之有龜
黿其淵冲以消吝封心熙氣融大明當軒留聘益尊施
教成均北許南吳先後合符人文之敷大明太史金華
宋濂贊

虞文靖公像贊

朱明之墟離火降精也丹鳥禪褫為駕綵輶也手握化
樞人文昭明也補帝袞衣五色熒熒也上凌霄漢下燭
九溟也無幽不啓無芳不榮也頓挫萬彙配合三靈也
獨騎元氣棲神窈冥也之死弗沒隨物流形也凝為商
雲燦為德星也琬琰所勒鬼秘神扃也命世之材一代
之英也

先師內翰柳公真贊

偉貌長身端嚴若神即而就之煦然春溫海濶天高莫
窺覘其宏度霆奔飈豎莫驅駕乎雄文來趨蹌之衿佩
作儀表於薦紳出入容臺振百年之禮樂昭宣帝制煥
大號於乾坤惟其具該博崇深之學所以繼光明俊偉
之倫仰瞻遺像有涕沾巾儻使泉臺之可作庶幾士俗
之還淳門人具官宋濂拜讚

吳山長像贊

原道書院山長吳履予之異姓弟也人之評履者則曰

履善屬文其嚴簡蘄絕處類秦漢間人語迫而視之有
淵光也一則曰履自幼沉酣義獻中行草書皆入妙品
如寶劍舞空光芒疊發芙蓉出水態有餘妍當與鮮于
大常齊驅其得意者或謂過之其知履僅若此至其尚
風義赴朋友之急不顧水火雖古人猶難知之者未必
能知履也因贊之以白履行于世贊曰

若人者其古君子之徒與聞人急難即欲赴之力縱不
及心懸懸其如飢水火在前幾若弗知輟轉不寐而長

夜以思世滔滔而莫察吾獨探其隱微彼以藝文為矜
銜者其相知也不亦淺而若人者其古君子之徒與

石巖林先生像贊

冰霜顏面鐵石心腸持斧七閩百壬斂藏神明之政淵
源之學其人雖亡清風猶昨

溟滓生贊

有序

溟滓生者盱江廖應淮海學也抱負奇氣好研摩運世
推移及方技諸家學年三十游杭上疏言丁大全誤國

狀大金怒中以法配漢陽軍生荷校行歌出都門道傍
觀者嘖嘖壯之抵漢江濱遇蜀道士杜可大揖曰子非
廖應淮耶生愕然曰道士何自知之可大曰宇宙太虛
一塵爾人生其間為塵幾何是茫茫者尚了然心目間
矧吾子耶然自邵堯夫以先天學授王豫天悅天悅死
無所授同葬玉枕中未百年而吳曦叛盜發其冢得皇
極經世體要一篇內外觀象數十篇余賄盜得之今餘
五十年數當授子吾侯子亦久矣乃言于上官脫其籍

盡教以冢中書其筭繇聲音起生神鑒穎利可大指畫
未到者生已先意逆悟可大自以為不及學既成去隱
宣歙間遇余安裕戈陽將教之安裕勸生業中庸生瞠
目厲聲曰俗儒幾辱吾康節於地下矣復去之杭客賀
外史家畫市大衍數夜沽酒痛飲飲即吐吐即飲不醉
如泥弗休醉中嘗大呼曰天非宋天地非宋地奈何奈
何語聞賈似道遣客叩之生曰毋多言浙水西地髮白
時是其祥也似道未解復召至屏人與語生曰明公宜

自愛不久宋鼎移矣似道惡其言掩耳走生亦徑出過
曾淵子家索酒轟飲酒酣作嬰兒啼曰大厦將焚燕猶
呢喃未已耶復賦歌以見意都人士聞之競指以為怪
民不與接獨太學生熊希聖猶時造其廬生私執熊手謂
曰吾端居層樓聞空中戎馬百萬來人鬼作哭泣聲壬申
襄樊陷甲戌宮車晏駕乙亥長江飛渡似道亦殛死臨
漳丙子三宮播遷諸王大臣皆南北亂走噓吸事耳子
不去歛何為居亡何宋事日非沿江州郡望風奔潰生

大慟曰殺氣又入閩廣中吾不知死所矣遂遁去其言
無一不驗後四年病死處州學中年五十二無子唯一
義女從之生宗堯夫先天之學頗自謂知易每見諸易
師傳疏不問淺深輒訛駁以為樂及論後天則尊羲畫為
經彖文繫辭為傳黜文言彖象二傳為九師之言且謂
說卦非聖筆不能作上下繫乃門人所述序卦直漢儒
記爾蓋生聰明絕人未聞道而驟語數故其論經多失
中然性使酒難近又好訐人陰私人面頸發赤不顧罕

有從其學者唯國子簿吳浚進士彭復樂師之浚不卒業復屢受唾斥不怨生將遁時召復至口發例手布籌雖平昔所靳若終身不示人者一舉授復復後又授鄆陽傳立云或曰生瀕死語女曰吾死後一月中朝命山姓烏名使徵吾及傳立當過予門汝可出藏書示之立當以此致大官後皆如其言所謂山姓烏名崔鵬飛也生所著書有玄玄集厯髓星野指南象喻統會聲譜畫前妙用數十萬言今猶間傳于世贊曰

龍圖成章有文從衡以濬以明以洩其藏以奠乎玄黃
昔我素王韋編三絕墜緒微茫誰其我綴我參我睽九
師襄之我苞我晶百氏攘之如河之渾如瞠而昏如治
絲以棼天未降割一髮攸存維洛有士居于百原超神
冲漠凝於畫先數往知來小大斯甄莫峻匪厓我陟其
顛莫深匪淵我瀹其泉簡材以畀非隱弗傳有冥者冢
卒昭以宣或得其桶載神于言炎炎宋錄維其訖矣長
星蝕柳色之赤矣眚祥見徵土髮覩矣朋昏以世莫之

戚矣魚在在鰲尚其息矣維生之知中如沸羹彼惛弗
知覆謂我狂我狂如何我憂孔多我山我河我用弗磨
俾淪胥以訛我酒既嘉我瑟又猷我寧不嘯歌北風其
涼旂旐央央我車龐龐蕩蕩江流杭之如陸有腥其穢
流血沃沃海氛方殷其何能目人有恒言風雨漂搖夏
宇障之涉于大川烝徒楫之楫副宇撓了了焉依國武
斯墜不知攸戒日隕弗升雖晝作夜鶚舞於林鬼瞰于
舍孰投是艱曾莫之艾乃怒乃驚乃瞻乃行乃遯死于

冥瞋生之為胡乃神以著微之古聖匪程伊度何以言之卒淪于數一曲之淹不通其故易道既泯數亦不類激贊於生發我長喟月出皎兮在天之心在天之心何古何今

余自幼即見長老談溟滓生事近見李淦性學及戚光子實所造文又知生為詳以生之精藝如此而修宋史者不列之方技傳中殊可恨也故予愍之特序之又傷易道之微激而贊之惜乎予文蕪陋不能永

生也然予情亦至矣瀟志

采苓子贊

榮陽鄭仲德有隱操嘗采苓九藍山間因自號采苓子
斯贊之所由作也贊曰

彼采苓者肥遯之士皦皦霞外不容纖滓白月入懷涼
颼沂櫺高視一世何慮何營

匡山居士真贊

紫眼有稜足以洞視千古長髯如戟足以畏讜百舌或

建大將旗鼓而殄殲於妖沴或被處士冠服而容與於
雲林可顯可晦載浮載沉一委順於外物初無累於貞
襟縣千尋之丹崖莫踰其峻瀦萬仞之重淵罔測其深
抱忠義之志而耿耿自信所謂不變不改若百鍊之精
金者邪

曾侍郎像贊

身形之瘦弱也則山澤之臞精神之凌厲也則列仙之
儒博極諸書而守之則約智周羣類而處之若愚當議

禮而考文較損益於錙銖稽百王之軌典翼一代之鴻圖豈非養德之腴造道之樞而為國之耆艾邦之著龜者乎

章判官像贊

唐福州軍事判官章公脩實檢校太傅仔鈞之父也其遺像至今蓋四百餘年矣二十世孫御史中丞濫偶於閩中購得之如獲至寶持以示其友宋濂因為作贊贊

曰

器局深沉容儀嚴肅吁嗟哲人如金如玉餘慶所被孫
子若雲重珪疊組至今揚芬

四十二代天師張公像贊

含冲葆虛執真之樞翊度宣靈契道之符龍虎衛乎左
右風霆屬於指呼此古之博大真人而今之列仙之儒
者邪

趙使君像贊

宋之王孫元之循吏才優識明政通民治未老而歸臨

難不貳懦夫觀之可以作氣

趙子昂像贊

文運中微頽波日靡公起東南作天一柱天人之表帝王之孫麟遊鳳翔珠明璧溫歷試中外遂居禁密其名之升與日同出彼憊邪者腐鼠敗豚何能病公臭穢自聞三百年間西東萬里雄鳴一代如公者幾公貌如玉公文如金變化莫測照耀古今

李太白像贊

元行臺治書侍御史亦憐真班所藏李太白像係秘閣
傳本吾友危君太樸嘗為之贊自後流落於金陵駱氏
酒家洪武己酉秋郡士王宗溥購獲之尋以摹本見貺
因造贊曰

長庚降精下為列僊陵厲日月呼噲風烟錦衣玉顏揮
毫帝前氣吞閭豎視若烏鳶頓挫萬象隨機回旋金童
來迎絳節翠旌下土穢濁孰堪後先蹶然一笑騎鯨上
天

傅同虛像贊

將求子於外兮則鍊精於三田欲索君於內兮則游神
乎八天是皆窺見夫粗迹而未能暢達其真玄高岑兮
谷綿白鶴舞兮蹁躑豈非長跨於洞庭之野吹瓊管而
招飛僊者耶

宜春夏都事遺像贊

以忠字
尚之

其才孔良其氣則剛沉潛乎仁義之府孺孺乎禮樂之
場窮春秋而寓哀斧法菽粟以為辭章使之專城而居

則可以攀次公之黃使之入直鑾坡則可追文成之張胡
為乎低回下列莫展一長託使車以遐覽竟仙游於五
羊豈詘于人者難知而信於天者不亡後千百年剛風
鬱滂當見騎麒麟而下大荒者耶

玄英處士方公遺像

予學子方孝孺玄英處士之諸孫也持處士像來請贊
贊曰

振騷雅於江南混漁樵於玉笥諫垣天近雖屢形州牧

之童牛夜夜寒終不奪煙霞之志凜然亢直之風可折
詔諛之氣遵真曜之遺則造玄英之私謚唯其畜厚而
發弘所以繼隆而傳熾紳笏蟬聯勲庸赫著蔓延閩浙
之間莫匪雲原之裔敢申贊辭式昭瞻企

王宗普像贊

以子為貴介公子耶何其神清氣和無綺紉之態也以
子為仙翁釋氏耶何其與時俯仰遊乎方之內也以子
為詩人韻士耶何其清奇勁直訥然而謙退也然則果

何為者耶蓋跡混乎三者之中而心游乎埃壒之外此
吾嘗謂空同子以古之人而處乎今之世也

危雲林像贊

文繼虞歐之盛位居廊廟之尊天下譽之而不為喜衆
人毀之而若無聞此公所以為大雅之君子傳百世而
存長者乎

王指揮像贊

真人龍興山川降精杖劍來從莫非豪英維時王公實

將家子虎吼鷹揚萬夫披靡成功錫爵遂鎮一方弛其
武威佩玉冠裳何以觀之有英其像益懋厥勛配古良
將

蘇都事伯夔像贊

子由後
平仲父

才足以行志智足以成事也苟盡施於時必有大過於
人而得位以行者僅出其一二也年齒之高林泉之趣
皆公之所宜有固天報善人之所致也惟有子之甚賢
以文鳴于治世足以繼絕學于前人揚休聞于不墜也

此吾嘗私為之善誦長公之言擬公於晁氏之君成而
知其無愧也

自題畫像贊

廣陵孫生貌予真人皆失笑謂無不似者因題其右辭
曰

似柔而強如愚而明辨駁百氏寤寐羣經千載之長一
世之短前武儼然吾敢不踐

又

吾心與天地同大吾性與聖賢同貴奈之何隨於曲學
局乎文藝忘其真實之歸溺此浮華之麗顛隳於得喪
之塗莊惑於是非之際縱濫廁於大方曾不離夫小智
靜言思之幾欲賈涕奮自今以為始日載惕而再厲有
如升嶽者當極於崇顛辟若改火者須資夫新燧期融
通於高朗誓殫治其蕪穢用致知為進學之方藉持敬
為涵養之地續墜緒之茫茫昭遺經之晰晰雖任重道
遠必篤行而深詣庶幾七尺之軀不負兩間之愧爾其

勉旃以終厥志

越國夫人練氏像贊

有序

天地之大德曰生夫生者乃天地之心雖陰陽之所運
行有開闔慘舒之不齊然天地之心生生而弗息者恒
循環於無窮有如碩果不食則其生道已具其中俟時
發榮挺然而莫之遏矣時至五代用兵爭強屠戮逮乎
鷄犬是天下極亂之時蓋無復人道有能於其間不為
氣運之所變遷而一念之仁有以契夫生生不息之心

則其感召之速所以敷遺於後人者其澤曷有既哉閩
之練夫人諱寓建州刺史章公仔鈞之妻也生而肉髮
深沉而端毅終日或不一笑言且知識有絕人者時閩
王命公屯兵浦城之西巖南唐盧將軍帥師來侵我公
遣二校請師于州失期將斬之夫人勸曰時危民未靖
公奈何斬壯士公悟不問二校逸入南唐皆為大將一
則金陵邊鎬一則上元王建封也保大三年二月南唐
遣江西撫安使查文徵伐閩取建州鎬為行軍招討建

封為先鋒橋道使奪其險要已而建封焚外郭八月甲子克之公歿已久獨夫人猶存二校遣使者持金帛遺夫人并以一白旗授之曰吾且屠城夫人宜植旗于門吾已戒士卒勿犯矣夫人反其金帛并旗弗受曰君幸思舊德願全此城必欲屠之吾家與衆俱死耳不能獨生也二校感其言遂止夫人之子一十五人孫六十八人多躋顯仕而其後人繩繩相繼位宰執登法從厯卿監佩守令之章者殆百餘人嗚呼何其盛哉非夫人有以

契夫天地生生不息之心則其施報之厚未必若此之至也原夫人之心渾廓昭融不限封域視一城之生聚不翅如一家真有所謂仁者之量歟慶以類大易之旨也夫人之後其有不蕃昌者乎其有不絢著者乎昧者不知天之未定謂為善無足倚是則天之生生之道絕矣夫奚可哉夫人二十世孫存道以遺像求予贊予既質諸傳記以序夫人之事而復為之贊曰

懿彼夫人生于七閩肉髮有倫靜毅而莊動循厥常女

士之良笄而有歸建州之妻其德與齊建州桓桓旖旎
緜緜以扼建關將固我城必集我兵移書以徵二校言
旋何期之愆絕首以懸夫人曰吁乾坤創夷壯士勿誅
逸之使奔遂為唐臣建旆而軍爭城以攻火旗畫紅陷
其四封二校有云使鬼為人夫人之仁曷其報之曷橐
我私曷授我旗旗植于家有突而譁我劍之加夫人曰吁
是城卒屠我生何為有衆若林昔而斧礮今而謳吟夫
人之亡其魄已藏其澤愈滂傳紫襲遍霧滃雲迷被于

今茲遺像儼然萬目斯瞻曷取則焉

黃氏三壽圖

浦陽合
溪人

資善

身安而家裕者人之所欲也藏智不用而厚重有餘者
天之所福也君有以契乎天故不求而自足也超乎寵
辱離乎毀譽而游乎物表此人之所難能而君之所獨
也

資深

智足以燭理而加之好學敏足以蒞事而本於無私事
長不以和樂勝禮馭下不以慈惠傷威行乎家庭春溫
而秋肅著乎言行方矩而圓規斯學者之所難能苟謂
之篤行君子其孰以為非耶

資文

人知其外之偉而不知其內之美知其才之豐而不知
其行之崇是蓋質而不二和而有禮介而能通者也

龍馬贊

有序

西南夷自昔出良馬而產於羅鬼國者尤良或云羅鬼
疑即古之鬼方其地有養龍阮在兩山之中泓渟鑰深
開闔靈氣而蛟龍寶藏其下當春日始和物情酣啗夷
人立柳阮畔擇牝馬之貞者繫之已而雲霧晦冥咫尺
不能辨色類有物蜿蜒上與馬接蓋龍云逮天色開霽
視馬傍之沙有龍跡者則與龍遇謹其芻藪而節宣之
暨產必獲龍駒焉粵若洪武四年六月壬寅夏國主明
昇以全蜀降獻良馬凡十而其一色正白乃得之於阮

者身長十有一尺首高九尺足之高比首而殺其二尺
有肉隱起項下約厚五分廣三寸餘貫膺絡腹至尾閭
而止精彩明晃振鬣一鳴萬馬為之辟易羈勒不可近
近輒作人立而吼上謂天既生此英物必有神以司之
親撰祝策詔有司以牲牢祀于馬祖然後勅典牧副使
臣高敬囊沙四百斤壓之人跨囊上使其游行苑中久
之性漸柔馴適八月癸巳上將行夕月之禮於清涼山
壇上於是乘之而出如躡雲而馳一塵弗驚皇情悅豫

賜其名爲飛越峯復命御用監直長臣馬晉臣繪其真
形藏焉臣濂稽諸載籍漢之元鼎中有神馬出渥洼水
中馬之生於水者尚矣養龍之說雖相傳於夷人要當
可徵不誣也肆惟皇上以大德而位大寶日之所出日
之所沒無不梯山航海獻贄奉琛邇者獨角之犀來自
九真食火之鷄貢於三佛齊之境其他倂形僑狀藉藉
紛紛且不一而足而況茲水產之龍馬乎周書有云不
寶遠物則遠人格所寶惟賢則邇人安皇上宵衣旰食

日懷保於小民巖穴之士蒐羅殆盡將圖治安如黃虞
時其遐荒殊裔珍毓奇產未嘗有心求之所以榮光休
氣洋溢中國仁聲義聞充洽八表而龍媒之異自致於
天閑十二之中揆之於書前聖後聖蓋同一軌轍也其
視貳師之遣黠武窮兵以索諸大宛者果為何如哉臣
濂以文字為職業際茲盛美不敢默而無言謹述贊辭
一首以貽諸後世贊曰

天駟熒蛟龍升靈泓澄神馬生祥麟瑞靄畫香冥天一

翕聚通精靈龍胡盈鳬臆輕竹披耳鏡懸睛花雪捲毛
光照夜汗溝有血霞流頰振鬣鳴萬馬驚閃流電逐飛
星九霄彷彿從龍行但聞蕭蕭風雨聲三川平八極寧
真龍媒獻龍廷出入天門駕龍駟太霞五彩蒲瑤京皇
風清皇道貞皇威明茫茫堪輿內孰敢不來庭陋彼漢
將軍空圍貳師城乃知天子在樹德不必連年徒用兵

墨鞠圖贊

建安蘇照為學子黃叔暘作墨鞠圖侑之以竹石豈以

其氣節之相同歟禁林散吏宋濂為造贊曰

我本中黃鐵為肝腸精神外章不自知形貌之黝歟綠
竹猗猗白石瑳瑳貞而匪阿斯為月下之友歟萬色齊
冥洞客物情雖暗而明豈陶令沉昏而托之酒歟

陳方都督像贊

桓桓俊英矯矯虎臣心雄萬夫才佚三軍爵列崇階功
在盟府圖像雲臺流芳千古

李徵君像贊

嗜義親賢以道自娛懿哉若人君子之儒

虎林處士贊

虎林處士王君年踰七十而視聽如少壯時其孫監察御史驥從予受經者久間來請贊贊曰

素髮垂垂中心熙熙儉勤作肥家之本嚴厲為馭衆之基好施之仁久而彌篤嫉惡之氣老而不衰吹鳳笙於明月之夜飛羽觴於百花之時大布寬衣容與委蛇不知謬稱虎林處士知之者以為瓊臺之神仙乎

華嚴經贊

有序

上人幻滅嚴持梵行欲求無上真如之道嘗自念言華嚴大經實中天調御第一時所談一乘頓教化為尊勝欲熱松為煤入以香藥搗和成劑以書此經而彼松煤者假物所就具黑暗相有染白法欲煅汞為丹承以空露研潤如法以書此經而彼汞丹者炫耀可觀能育人自非助道者欲推赤金素銀廉薄如紙復粉為泥以書此經而彼金若銀雖曰重寶外塵為體初不自內以是思

惟身外諸物若勝若劣若非勝非劣若一若多若非一
非多皆不足以稱此殊利繼我一身內而心膂肺肝外
而毛髮膚爪資血以生資血以成資血以長資血以至
壯老暨死是則諸血衆生甚愛如梵摩尼一滴之微莫
肯捨者我今誓發弘願於世尊前以所難捨而作佛事
從十指端刺出鮮丹盛於清淨器中養以溫火澄去白
液取其真純蘸以霜毫志心繕寫滿八十卷尊閣益壽
禪居昔者樂法比丘當無物時欲聞佛語了不能得乃

信婆羅門言以皮為紙以骨為華以血為墨願書一偈
況今千百妙頌十萬正文不止于一縱捐軀命以報佛
思無足為異於血何吝唯願法界有情或見或聞證入
雜華藏海證入雜華藏海已即得六根清淨得六根清
淨已即得自性清淨得自性清淨已即得四天下微塵
刹土中一切衆生皆悉清淨無相居士未出母胎母夢
異僧手寫是經來謂母曰吾乃求明延壽宜假一室以
終此卷母夢覺已居士即生今逢勝因頓憶前事於是

親燭五分妙香香雲輪囷結為寶網編覆經上乃復合
爪向佛散華作禮而稱贊曰

雜華淨智海九會之所說一音所演唱十處放光明信
解行證門總攝無復餘如是具五周如是辨六相如是
分十玄妙義皆充足以至四法界二十重華藏無邊香
水海教條有差別性相子無礙圓融與行布非異亦非
同一可為無量無量亦為一重重無有盡是為功德聚如
來最上乘龍宮所秘藏上人出身血嚴飭書此經於一

滴中中普含十方界於一一界中普現光明臺於一一臺中普成獅子座於一一座中普見分身佛如上無數佛皆具大威德眉間白毫光徧滿一切處共宣大乘法聞者應解脫譬如日月生照三千大千悉見種種色法能破暗故譬如大洋海波平乃如掌無邱陵堆阜法能平等故譬如陽春至大地盡發生諸根各萌芽法能需漑故譬如梵志夢一夢千劫事不過刹那間法能融攝故譬如子憶母未見心已至形神皆兩忘法能無離故

譬如黃金色金色不相分金亡即色空法能不二故譬
如石性堅初不從外得石性自圓滿法無修證故能如
斯見解見經不見血若加精進力見佛不見經及至成
道已見性不見佛我性如虛空了無能見者無見中有
見全體即呈露苟執於所見亦非我本性見見二俱泯
此為真見見真見復何有性本無物收一心歸命禮祇
夜以為贊諸妙樓閣門彈指一時啓

大還龍虎丹贊

有序

龍虎丹贊為予友鄭源氏作源因讀金碧古文龍虎上經有悟大還之旨用之修練節節有奇驗復以其玄秘也請予白之作是贊贊凡四章

苞乾靈一

人身苞精氣妙與元化并一神管攝之鉛汞各流行神所棲止處實為天地中闔闢類兩扉循環不竭窮廓然含冲虛獨立不以形是即真息根強名帝乙庭靜極必自顯內境垂白叅或想為連環無乃喪其常

幹化紐二

凝神入紫虛冲然抱一居青龍鬱上升白虎為熬樞牝
牡既相從蒸潤如流酥鄴鄂一以固溫養成子珠銷實
離中陰坎陽復來隨純剛號為乾潛躍契道符鬱羅蕭
臺中服霞漱雲腴閱歷無窮年永共溟滓具

考火記三

鼎爐乾坤樞匡郭水火魂戊己居土官一氣中夜存火
候十二時暮蒙復朝屯專氣而致柔綿綿日相因刑德

務並進文武須錯陳薰蒸洽太和天機盜神津三元與
五氣一一返其根後天不能彫長為萬象尊

稽曲徵四

三千六百門盡墮魑魅場雌雄鑄為劍日月吸光晶尾間
開玄液九鼎運女英三遜及五假八石巧煎烹如此之
舉措難可一二名陰魔奪人命遺屍莽縱橫寒飆動
羅鄴時有鬼嘯聲方知涉有為不可學長生


觀音石贊

虎林翁君祥卿得圓石一大可五六寸上現圓通大士
妙嚴寶相坐寶蓮華善財童子合爪侍側蓋大士住不
可思議解脫門能以神變作諸佛事攝受衆生大則示
化真身於陀怛洛迦山小則寄影像於一木一石不假
人為自然天造無非自慈愍中發現祥卿因請濂作贊
以顯神功以示闡提生我慢者贊曰

玄黃既肇分白石即受質斯時未有佛云何能應現千
劫皆不化難以時節拘劫初與劫終常居寂光土石本

無情物其頑無與等初無感通者云何佛示像微塵剎
土中塵塵皆是佛有情與無情本來同一體諸佛亦無
數動曰那由他云何圓通佛獨此示神變圓通於支那
夙有大因緣所以不會捨如母之憶子如來談諸相皆
是虛妄集云何自著相曷以釋迷網田相以悟性正如
指指月見月指則忘寧有繫執故以此四者觀唯知佛
願弘聖凡盡融攝調御菩提心假石顯云異超出思慮
表既非圖繪力又匪鐫勒功幻成妙嚴相七寶作瓔珞

瞑目結跏坐正以慈愍故用警闡提者徒爾增我慢當
知神通力乃復有斯事始悔未見時口出不淨語如仰
首唾天唾還著面故愚癡誠可念寧忍加斥逐我願大
地人無不知三依見石非見石見佛亦非佛但見無量
光各自心中發徧照十方界明如日月燈十方諸品類
盡得諸佛智



文憲集卷三十

欽定四庫全書

集部

文憲集卷三十一

詳校官中書臣吳璫

中書臣劉源溥覆勘

總校官降調編修臣倉聖脉

校對官編修臣章宗瀛

謄錄監生臣朱汶

欽定四庫全書

文憲集卷三

三十一

明 宋濂 撰

忠義

凡二章

宋攝松陽丞助教梅瑒

洛之死執禮嘗哭之曰吾從父一老儒生耳平日恂恂似不能言者乃能慨然守百里之地以蕞爾之軀膺虎狼之暴至於糜身弗顧執禮之言其真足信哉凡人外

柔者內未必柔但視其所存為何如耳世槩以白面書生目之可乎哉可乎哉是故溶之死非儒弗能故又冠曰儒以見儒術之有功於名教也人主嘉其忠而旌賞如是可可以勸矣故特志之

宋戶部尚書梅執禮

自宣和至靖康七年之間而梅氏一門殺身徇義者凡二人豈非難哉夫生者人之所甚樂而有家之私又人不能遽忘彼豈甘於頸血濺地而自以為得計哉第

以君上決不可背名教決不可負綱常決不可虧忠義
一激雖泰山之高不見其形雷霆之鳴不聞其聲刀鋸
在前不覺其慘鼎鑊在後不知其酷必欲得死然後為
安也今去之雖數百載忠剛之氣充塞乎天地之間凜
然如生非烈丈夫能如是乎使當時縱能屈膝受辱以
保其首領受人唾罵受人賤惡雖生百年又何益也賈
誼有言曰守圉捍敵之臣誠死城郭封疆梅溶以之法
度之臣誠死社稷執禮以之

孝友

凡三章

梁處士何千齡

千齡當唐季人倫廢壞之時孝行推於友睦而禮遜之風數世不衰真所謂豪傑之士矣夫閭巷布衣之家雖其所為不足以驚世動俗有能修孝友之道者朝廷必下詔以旌之史官必求其實而書之脫或史官失書賢士大夫又必從而謹志之則其事往往反足以傳於後世豈非天經地義不可磨滅有非區區功名富貴者所

可同也哉善乎魏徵之言曰雖或位登台輔爵列王侯
祿積萬鍾馬踰千駟死之日曾不得與斯人之徒隸齒
其言又豈不信然也哉嗚呼有志之士寧不於是重有
感哉

宋處士鍾宅

鍾宅一家剔肝剗股者三人亦皆出於迫切之誠或舉
韓愈氏所論鄩人者非之非之誠是也較於親病不當
藥者豈不有間歟書而列之非嘉宅也愚又聞之兄弟

之不和每起於妻子之離間非丈夫有遠識則為其役而不自覺一家之內乖變生矣此文廣之出妻雖非至德而亦甚難事也然則如之何而可嘗見遠識之人知婦女之不可諫諭而外與兄弟相愛常不失歡私救其所急私調其所乏婦女不與聞焉亦可謂善處妻子兄弟之間者矣

明處士黃逢原

嗚呼子壯而分婦姑反唇相稽秦之俗已然矣況去古

日遠風氣日益漓黃氏能不染於末習卓然不變其恒
度豈非真豪傑者耶浦陽以義居聞者二三人唯鄭綺
之家已至十葉黃氏知感慕而興起進修益力烏知不
綺若耶雖然許史之稱未足為貴也猗頓之貨未足為
富也唯孝友積諸躬令名昭於時其為貴且富也大矣
所謂特立兩間而無愧稽諸賢哲而有徵著之後世而
可法何莫不由於斯黃氏孫曾可不思自勗哉

政事

凡七章

漢尚書僕射楊璇

嗚呼政事於人太矣操厚倫惇俗之具執舒陽慘陰之
柄御賞善罰惡之權任出生入死之寄其在朝廷則四
海被其澤其在一郡則一郡仰其賜其在一縣則一縣
受其福苟得其人則上明下淳歌謠太平一或反是則
流毒四境神怒民怨至有激成他變者其所繫甚重且
難也蓋如此人能以一善自效於官者豈可使之泯泯
無聞乎縱曰往者之不可作寧不使來者之知勸乎嗚

呼紀載之文其可少乎蘄竊拳拳於此不可知者固已
無如之何幸猶可以考見者輒不敢不書自楊璇至趙
大訥凡十一人雖官有崇卑治有優劣其利吾民一也
因盡錄之

宋撫州刺史蔣邵 諸暨令張敦 鄂州刺史
傅柔

洪遵撰東陽志書楊扶在蔣邵張敦傅柔之後且言邵
歷洪撫二州刺史轉交州敦遷車騎大將軍柔亦刺鄂

州扶東漢時人也遵既如此書則邵等宜在扶之前無疑矣濂不謂然漢朝之車騎將軍衛將軍左右前後皆位次上卿典京師兵衛則車騎固漢官也敦為扶前人也未可知若洪在兩漢時名為豫章而撫之地隸焉鄂亦名為江夏郡並無稱洪撫鄂三州者及隋平陳始皆置之而冠以今號則邵柔疑隋以後之人也遵曾不考之是果何耶浦陽未置縣時地屬烏傷扶自曾祖茂來遷考其所居處實今縣地故扶之墓猶在縣西北十五

里扶之子孫不見有別居之文遵獨據舊經以扶隸浦陽以扶之子喬璇隸烏傷其又何耶濂皆不得不正之

宋工部侍郎傅雱

古語有之人才必臨事乃見豈非然哉雱之使金也制詞甚褒之至有庶爾一言之合為吾兩國之成之語則當時任寄之重可見矣雱亦奇男子哉

宋訓武郎黃仁環

仁環者區區一劍之雄耳其初未必不鈔掠為人患亦

復進之士君子之列何哉有過錄善春秋之義也錄之斯進之雖然當賊氣正銳之時使仁環不急挫其鋒則數萬生靈血汚荒原矣

宋太常少卿王萬

人之欲猶夫疾也聖賢之書猶夫藥也以藥治疾則疾瘳而體和以聖賢之書克欲則欲去而理明自然之勢也世顧玩之以為辭章之助雖日誦五車亦何補身心哉萬自聞季衍讀四書之一言潛思精索反以自治故

其律已則義利截然表裏不欺治小民則忠厚粹和不
事威斷人自感服居言官則不畏權奸擊之愈力言或
弗行掛冠徑去嗚呼是可謂善讀者矣當時賢士交口稱
譽或謂其如白圭振鷺玉尺冰壺或謂其振荒如朱熹
先見如蘇洵呂獻可無實功者能之乎嗚呼是足以貽
不朽矣視彼抽秘思騁妍辭而與庸人孺子同一澌盡
者竟何為哉竟何為哉

元大學士吳直方

天之生材欲振之張之以昌大其支必抑之歛之以培植其本譬之於物其榮腴流鬯於發生之日者皆出於嚴氷雷雪折摧之餘蓋養之不厚則發之不茂其勢然也公以惇龐宏碩之資蘊康濟經綸之具司造物者特晦之於少齡而顯之於耄年其意亦猶是耳

元知永新州趙大訥

丈夫之以功業自見者豈必藉祖父之勢哉藉祖父之勢而成者世豈無之終不足謂之丈夫必也奮自布衣

卓然有立小或作州牧大或聞國政使德澤簡在人心
聲聞流於後世然後始無媿於斯名善矣哉吳趙之為
何其近是耶雖然均名為人均生是邦均食粟衣帛而
有能有不能焉稍知自勵者可以惕然而省矣

文學 凡十章

宋屯田員外郎于房

于房論文有曰陽開陰闔俯仰變化出無入有其妙若
神何其言之善也蓋文主於變變而無迹之可尋則神

矣司馬遷班固韓愈之徒號為文章家其果能易此言哉宜其三世以文名也譙竊慕之歷求其文而不可多得近過左溪山見房之子正封所書碑字勢雄拔如蛟螭虎豹盤拏後先慨然想見其為人登高遐望精神為之飛動嗚呼數百載之下能令人思之不置者必有以也夫

宋著作佐郎朱臨

天聖慶厯間縣之能文章者唯于房父子為盛優於經

學則臨一人而已臨之所傳有淵源意其所著必有大
異人者今皆亡之惜哉濂幼時尚見臨所受嘉祐告身
於吳明孫家明孫蓋朱氏外孫其亡亦已久今又不知
何如也斯文存亡尚往往類是豈沉酣聲利者為可恒
也哉

宋工部尚書錢適

四朝史有云瑤華失位而復也太母實詔之姑有遷婦
之文母有改子之道播之天下合於至公誠哉是言也

適在當時孰謂其不知此理耶其意蓋有所循焉爾執禮銘適之墓嘆其剛方少圓死生負謗其厚於揚善者哉

宋太學生何敏中

世之人培克自恣剥膚及髓苟臨患難人將甘心焉如盜感敏中之恩庇百人而不殺者有之乎愚謂世衰道微士習日靡工文辭而苟利祿奔走乞哀於權倖之門惟恐不一售者有矣如敏中之以八行及遺逸薦而不受

者有之乎朋友道喪平時指天日為誓一旦臨小利害不引手一救反擠之下石者有矣如敏中鬻行橐而歸朋友之喪者又有之乎

宋處士朱有聞

揚雄有言曰君子純終領聞蠢迪檢押如敏中有聞二人是已議者以立傳之法必關大勸懲則書若二人者碌碌爾庸庸爾何必累簡編哉濂曰不然世之人培克自恣剥膚及髓苟臨患難人將甘心焉如盜感敏中之

恩庇百人而不殺者有之乎奔走州邑奴事上官望塵
亟拜掃門求通唯恐不能一見如縣令丞欲謁有聞而
不可得者又有之乎時非三代人有小善必取曾謂二
人之行而可遺之乎激而書之知者當識之也

宋布衣倪朴

宋自宣和之後國勢不振金人乘釁長驅而入破陷太
原侵軼真定攻擣汴京以致天子蒙塵生民暴骨當時
臣僚謂宜枕戈待旦不共戴天以洗刷國恥以尅復土

疆乃復割地議和頓首請命忠義之士雖欲有為每擯
斥不用卒致淪亡而莫之救哀哉朴以一布衣之微非
有爵號之榮祿賜之厚乃能赤心憂國吐其耿耿直欲
叩帝閭上之雖其書不能進其視賈延佐之二疏陳亮
之三書俊快朗烈照耀後先如朴者豈非人傑也哉使
朝廷用之未必不能立奇勲奈何奸惡秉軸有志之士
不獲洩其忠憤之氣推是言之亦不獨人謀之不臧也
嗚呼王業終至偏安父讐終至不報必當有任是責者

幸朴書猶存百世之下非惟使英雄灑淚肉食者聞之亦或知勸哉

宋處士黃景昌

縣之立言之士名不著者三人宋元祐紹聖間有朱恠者師黃山薛大觀大觀得平陽孫復春秋之學恠悉傳之嘗著春秋羣疑辨若干卷宋季有蔡慶宗光遠者以春秋舉于鄉後以恩補官至武進丞亦著春秋集解若干卷有陳訥升之者通周易得先儒未發之秘亦著河

圖易象本議八卷今皆散佚無存或僅存人亦鮮知之者竊意事功之實行難亡語言之空文易泯故致是爾然則世之傳者亦何往而非空文哉必繫其學之醇疵醇則習之者多疵則傳之者少也嗚呼信如是說古之荒誕不經之文縱橫捭闔之術可謂極疵矣至今熟在人口者又何其多耶是蓋有不可曉者意亦有幸不幸存焉幸不幸天也天則非人之所知矣雖然人衆者勝天文之得傳與否實繫乎後之人天何預哉今觀景昌

所著之書亦將散佚無存矣濂為此懼故得而備論之

元翰林待制柳貫

公負瓌雄絕特之才畜峻大剛方之德發而為文則沉雄而雅勁見于行則端重而遂直怠色不形于面媚言不出于口所學以聖賢為師而不戾俗以為異所至以教化為重而不阿世以為同起為人師入造胄子周旋禮樂之署統教吳楚之區晚歲就徵入掌帝制其于闕異端扶倫紀黜淫祀排勢臣勁氣直辭可輔彛訓危言

卓行可激貪懦迨其退而燕處凜然神居屹然山峙喜
怒不著語默有恒可謂有德君子矣

元處士吳萊

濂嘗受學於立夫問其作文之法則謂有篇聯欲其脉
絡貫通有段聯欲其奇偶迭生有句聯欲其長短合節
有字聯欲其賓主對待又問其作賦之法則謂有音法
欲其倡和闔闢有韻法欲其清濁諧協有辭法欲其呼
吸相應有章法欲其布置謹嚴總而言之皆不越生象

還三者而已然而字有不齊體亦不一須必隨其類而附之不使玉璫與瓦缶並陳斯為得之此又在乎三者之外而非精擇不能到也顧言猶在耳而恨學之未能因志諸傳末以謹其傳焉

宋潭州儒學教授張森

元翰林文字陳公舉

明儒學教諭張端臣

翰林檢討鄭棠清

逸處士鄭柏

中書舍人周肢

編修趙友同

文學之士自古及今以之自任者衆矣然當以聖人之

文為宗文之立言簡奇莫如易又莫如春秋序事精嚴
莫如儀禮又莫如檀弓又莫如書書之中又莫如禹貢
又莫如顧命論議浩浩而不見其涯又莫如易之大傳
陳情托物莫如詩詩之中反覆咏歎又莫如國風鋪張
王政又莫如二雅推美盛德又莫如三頌有開有闔有
變有化脉絡之流通首尾之相應莫如中庸又莫如孟
子孟子之中又莫如養氣好辯等章嗚呼濂之所言者
客爾以其所言推其所不言蓋可知矣人能致力於斯

得之深者固與天地相始終得之淺者亦能震盪翕張
與諸子較所長於一世雖然此特論為文之體然耳若
原其本則未也其本者何也天地之間至大至剛而吾
籍之以生者非氣也耶必能養之而後道明道明而後
氣充氣充而後文雄文雄而後追配乎聖經不若是不
足謂之文也何也文之所存道之所存也文不繫道不
作焉可也苟繫於道則萬世在前不謂其久吾不言焉
言則與之合也萬世在後不謂其遠吾不言焉言則與

之合也是故無小無大無外無內無古無今非文不足以行非文不足以傳其可以無本而致之哉蒲陽雖小邑自宋以來以文知名者甚衆大抵據經為本有足貴者

貞節

凡二章

宋節婦何道融

詩曰無非無儀惟酒食是議釋之者曰有非非婦人也
有善亦非婦人也唯議夫酒食而已蓋婦人之行不出

閨門在無事之時尚不欲以善自聞况當哀苦之餘稱之曰未亡人而顧以是自銜歟君子之論每欲先之而不敢後者豈非憫其志之確而不少變歟抑將假是以勵其不能者歟世之材士大夫習俎豆攻詩書坐而堯言行而舜趨其自負誠不在古人後一旦受人家國之寄輒懷二心者有之矣况區區一女子所事不過織紉中饋之間反能守死自誓如秋霜烈日不可狎玩又可得而少之歟是故楚之貞姬梁之高行漢之桓嫠皆登

於彤管之書者殆以是歟雖然貞節之昭風俗之偷也使當比屋可封之時果孰名其為貞婦貞婦之得名蓋以世之不貞者衆也濫又豈得不為衰俗一概也歟

明鄭節婦黃琇

昔者孔子稱宓不齊之善而歸於魯國之多賢蓋觀感而興非有資於賢者要亦未易以成德也今鄭氏之家十葉聚食其規度整肅如嚴霜烈日可畏而可仰其德義之涵濡又如春風和氣之薰蒸不自知其入人之深故

其化行教洽過其門者猶率德勵行而垂戾之慮消况
為其家之婦者乎宜守貞執節之堅而循禮之謹也傳
曰一家仁一國興仁其理誠不誣哉

琴操 凡三章

飛泉操

浦陽玄麓山有飛泉濂與鄭原先生數觀之造飛泉操
鼓之琴書諸崖石其辭曰

飛泉兮瀏瀏洗耳固非兮誰飲我牛覆謂我汚兮移彼

上流具人之形兮奈何忘人之憂

琴操二首

余將有遠行道過雙溪之上中心隱憂未能釋去逢友
琴生於麗澤精舍乃製穹霞洞林二操使彈之流宮含
徵其聲泠泠然恍如坐青蘿山中時也生亦清俊士哉
其辭曰

有穹者霞其色楚楚朝宜弋於林暮汕於渚役車駸駸
胡弗之休視彼江水彭然東流

有洞者林其色陰陰可以樂飢可以洗心中有白雲藹其承宇我親之思我心之苦

含山操二解

有序

含山操者為和陽王綱妻吳貞媛作貞媛遭兵亂乃能完節蹈水死其不有繫民經之大者乎辭曰

含山有雲莫蔽我衣彼荷戟者迫我以馳我馳我驅泣涕如雨仰視日光不照下_叶地不可穴天不可緣舍旃舍旃我尚何言

含山有石其光差差石或可轉我節可虧我夫何之欲
從無所舍彼黃泉無相見者叶誰謂淵深我視若陵我
死得死中心之寧

琴操二首

客有吏於海東者以能擊貪暴聞然終用是受誣嘔血
死予友胡徵君為著哀辭一通予讀之甚悲竊取其意
作哀海東傷妖女二操使善琴者彈而和之客之鬼或
有知則其鬱鬱之氣庶幾少伸矣乎辭曰

我哀東海而思之苦彼何人斯猛噬如虎我不擊之我
民之憂縱不我與覆以我為仇蒼天雖高寬其有極非
血之嘔曷明心赤泱泱大風沉沉寒泉舍旃舍旃我尚
何言

有妹者女顏如舜英詆我以醜我其何傷眩白為黑古
亦多有自尤不遑敢誰之咎黃鵠飛來其音聞聞我心
苟安何戚弗欣天上地下命也柰何命也柰何焉知其
他

鼓吹曲

凡二十二章

王國祀仁祖廟樂章

迎神奏淳和之曲

皇圖聿崇茅社受封禮分雖異孝思則同緬懷世德源
深流鴻報本有祀式昭神功

奉牲奏慶和之曲

王國之東清廟翼翼奉我皇祖享祀弗忒薦以牲牷敢
曰充膋神其廸嘗純嘏是錫

初獻奏保和之曲

皇祖載德既淳且仁弗耀其身委祉後人瞻茲藩服典
祀維寅清醴方薦歆其苾芬

亞獻奏清和之曲

穆穆靈宮庭燎有煒貳觴載升神其樂止其樂伊何錫
我繁祉磐石之宗本支百世

終獻奏成和之曲

神兮下臨陟降在庭不見其形如聞其聲冷風蕭然達

於兩楹禮成三終神保攸寧

飲福奏咸和之曲

神具醉止威儀孔肅曰爾孝孫來飲爾福介爾眉壽膺
爾百禄子孫保之以引以續

徹豆奏嘉禾之曲

禮備樂舉祀事攸宜孰其尸之廢徹不遲皇哉神惠覃
及我私靈氛將逝如何勿思

送神奏德和之曲

香兮忽兮神運無迹鸞馭上征星流飈疾其靈在天其
主在室億萬斯年孝思無斁

宋饒歌鼓吹曲

臣聞真人應運而起旋陰轉陽協和神人剡革僭偽期
底隆平於時五季之亂已極光嶽氣分河海怒溢強臣
悍將割土分疆擅執節鉞倒持天柄敢拒帝命莫之敢
制我太祖躬屬橐鞬奉命四征赫聲濯靈所向輒克姦
惡授首獻於太廟已而大功既茂天命攸歸乃受周禪

即皇帝位璽書誕頒天日昭煥凡厥臣庶莫不翹足延頸以俟太平皇帝若曰皇天既畀我有家朕夙夜曷敢荒寧彼縈燭之微僅若一髮欲抗明於日月疇能置諸朕當剪其孽芽毋使滋蔓爾有衆尚克協乃心以底天之罰越建隆元年夏五月丁巳上親征澤潞六月辛巳克其城李筠赴火死冬十月丁亥又親征淮南十一月丁未傳其城未幾拔之李重進亦赴火死乾德元年春二月高繼冲遣客將王昭濟奉表稱臣而荆南平三月

壬戌王師入朗州獲周保權以歸而湖湘又平三年春正月取劍州蜀主孟昶封府庫以降開寶三年秋九月己亥朔伐南漢四年春正月辛未次白田其主劉鋹素服出降七年冬十月王師伐南唐八年冬十一月乙未李煜奉表納降由是天威所加如雷如霆有觸之者靡不殞滅太祖既棄羣臣上游帝所太宗嗣厥大寶駿惠前烈文綏武戡讎唯日不足太平興國三年夏四月己卯平海節度使陳洪進以漳泉二州獻五月吳越王錢俶

復盡獻其國所有地四年春二月甲子上親征太原夏
五月甲申北漢主劉繼元率其官屬銜璧入朝自是海
內羣雄皆為臣僕風氣宣通罔有限域東西幅員盈三
萬里梯山航海獻贄奉琛委蛇而來上實天府戴白之
叟垂髫之童皞皞熙熙莫知帝力於是宋興至是己二
十年矣臣惟帝王之興自有貞符歷古以來史不絕書
我太祖之生也祥光瑞彩流為精英異芳幽馥鬱為神
氣所居之地紫氣隨之建纛而出白日為暈是蓋上天

著厥嘉貺以流耿光於無窮故自唐虞禪受之後鮮不以征誅而得天下其中豈無揖遜而紹位者皆陽予陰奪尋即廢之惟我太祖應乎天而順乎人陳橋之戴黃衣之加蓋迫於甚不得已爾由是能大一統臣服四海用作神主聖德神功巍巍堂堂傳至孫子億萬斯年跨漢唐而追三代何其盛哉然而短蕭鐃歌黃帝岐伯所以建威揚德風勸敵士者也周制因之其在大司樂則王師大獻乃令奏愷樂在大司馬若師有功則愷樂獻

于社大抵皆軍樂也古樂久已亡失至漢有朱鷺等十
二曲列于鼓吹謂之饒歌今尚可考見自時厥後代有
其辭而唐柳宗元獨準漢曲倣其篇數作鼓吹饒歌以
紀高祖太宗功德及征伐勤勞之事臣雖不佞自幼以
文字為職輒取法漢唐窮思畢精作為歌辭以侑戎樂
沿兵振旅之際得於馬上奏之焜耀鏗鏘震撼無際使
有宋之成烈增光於後無讓於前臣死且不朽臣謹冒
死上

太祖生洛陽甲馬營中神光滿室有香郁然經宿不散此聖徵先見者也為啓聖徵第一

啓聖徵兆載先炎精降爛以鮮破重陰燭層玄合之暢神必宣應昌期馭宰權天序叶地軌甄星游渚白帝延氣貫月永殷年質往牒無不然惟皇符熾且騫著成烈在不刊

右啓聖徵曲凡二十二句句三字

太祖將北伐師次陳橋驛諸將以黃袍加上身

列拜庭中稱萬歲遂詣崇元殿行禪代禮為受

周禪第二

受周禪崇靈基飛龍在天黃道開躬握乾衡鎮坤機蒼
精喪木無支黑光盪日見重輝天人同厯數歸靈承帝
祐流鴻滋嘉瑞章紛若敦神爵集肉角來坻灝灝俗恢
恢昭皇威時赫戲

右受周禪曲凡二十二句其十八句句三字
四句句四字

昭義節度使李筠據澤潞弗服上御六師平之

為靳老雄第三

靳老雄雄勢威連冠師樹高纛襲邊城施蠆毒王赫斯
怒誓加戮百萬貌貅若林矗行視嵯峨勝平陸升城齊
呼山嶽覆飛矢貫臂拔其鏃雄斯窮畀炎熇朱鳥鳴反
舌縮反舌縮四海服

右靳老雄曲凡二十二句其十七句句三字
五句句四字

淮南節度使李重進不庭憑恃江淮招集亡命
上親討之為長淮沸第四

長淮沸沸若湯有蛟下潛石作房腥沫旁灑矛距四張
欲鼓孽浪浸日光真龍出火鬣明炳暴髓焦毒吮殲厥
凶醜如刺狼水安流若鏡平皇威洽濊澤滂建萬寓慶
無疆

右長淮沸曲凡二十句其十五句句三字五
句句四字

上遣將討張文表假道荆南其主高繼冲懼奉
表稱臣為耀靈威第五

耀靈威奄八蠻如山壓卵颺噓塵大帥率師手握矜

渠中

切矛
炳也

策馬飲江江水渾渥摩日月搖星辰孰敢奸命馘

以狗蠻荆輿觀稱妾臣剪拜柯條剗其根一朝坐鎮百
粵門南荒帖帖絕妖氛

右耀靈威曲凡二十句其十一句句三字九
句句四字

師克南平趨朗州武安節度使周保權拒命討
獲之為鷹之揚第六

我鷹之揚于彼南楚目城無全尚何有險阻虜周惛惛
曾莫構思仇孽既殄胡反噬我師裒騎厲華旄旋海水
立霄旭昏殺氣回薄翦若烟濯征斯克功無前王度遠
引靡不肩

右鷹之揚曲凡十八句其七句句三字九句
句四字二句句五字

諸將伐蜀取劍州蜀主孟昶封府庫請降為巴

蜀平第七

惟彼巴蜀務靡麗以夸金塊珠礫納政於邪於鑠王師
如虎如鸞捕夷凶族使民氣以攄足不加首臂豈大於
股啓關迎降崩角無敢後聲明宣流被區有百蠻來同
孚至理上鄰二五皇德美且阜

右巴蜀平曲凡十八句其二句句三字十一

句句四字五句

南漢劉鋹據嶺南良將征之鋹教象為陣以禦
我集勁弩射之奔鋹遂詣轅門降為象斯奔第

八

象斯奔擴南燭開重昏揭兩曜通粵海接閩徼虜初弗
知跳踉以戲敢持厥轂雖鬪與隼俱力索氣銷始就縛
三早凱旋奏戎樂威神出自天顯彼帝畧千秋萬年烝
庶和且延

右象斯奔曲凡十八句其八句句三字七句

句四字三句句五字

王師伐江南江南主李煜降時彗出柳歷輿兒

為彗出柳第九

維彗出柳六合布新矧此彈丸何敢不臣弮弓宛轉鐵
騎叅譚天塹未度已無江埂帝詔將臣俟其來賓慎毋
疾擊以病吾民長蛇成圍不異祥麟孱王既降市無驚
塵大宣皇化覃于至仁

右慧出柳曲凡十八句句四字

太宗既繼大統平海節度使陳洪進獻漳泉二
州為拓閩關第十

閩關屹南紀上應牛女星南將窺瘴海東或帶滄溟五
季失羈御藩鎮擅甲兵太阿既倒持僭竊瀆恒經誰歟
據二州於此建節旌予奪自己出况復望來庭太宗嗣
寶符渙號風霆行稽首歸厥命覆冒仰王靈鞮譯通絕
域珪贄集明廷神猷杳難測穆穆臻泰清

右拓閩關曲凡二十句句五字

吳越王錢俶見上威德日盛盡獻其土地為吳
越歸之十一

皇王握神契重華叶帝謦神兵從天下歛忽千萬餘揮
戈日為回投鞭海成枯奮擊八極間健疾飛電如錢氏
最先覺方物久內輸終知喬嶽尊邱阜欲何須登民獻
天府不煩神戈誅帝德統罔極萬國混車書

右吳越歸曲凡十六句句五字

海內咸臣唯北漢假息湯釜上親征之其主劉

繼元素服紗帽待罪臺下詔釋之為克戎逋第

十二

汾晉十萬甲數葉僭為君蟠根欲弗拔毒虐我烝民聖
人攄武師威烈赫然振刀戟夜生火出入動若神方將
藏下地習已凌高昊有城皆作醢無甲不為塵戎逋膽
已落舉族悉來臣羣氓如流魚挈置瀛海津自茲遂生
育陶然履太淳阪泉著軒德毋浦明堯勛赫赫炎德殷
永世同不泯

右克戎逋曲凡二十二句句五字

四言古詩 凡三章

風樹亭詩 有序

風樹亭者嘉禾潘孝子之所建也孝子之親沒每對人言輒嗚咽流涕然無以寓其罔極之思取韓詩外傳樹欲靜而風不止之言表其墓亭嗚呼孝子之意至是為可悲矣夫人孰不欲養其親親則不子待也所以昔者臯魚泣泣而死者孔子蓋傷之也憫之也以其志為可

悲而無所用其力也嗚呼若孝子者念念不忘乎茲其亦知沒齒慕親之道哉為之詩曰

山有嘉樹油然發榮豈不欲靜風撓之嗚我思我親顏
貌日改子欲養之親不子待嗚呼噫嚙孔懷孔悲山高
海深孰堪喻之內而九藏外而四體皆親之枝同一根
抵根既撥矣而枝獨存夙夜哀號莫達九原白楊蕭蕭
泉扃夜闕我親我思得無焦瘁親不可見音容是求求
之不得血淚交流作亭墓隅是曰風樹仰之瞻之心焉

孔齊

右詩八章章四句

靈槐詩

有序

四明史氏貴富光榮與南宋相終始非特人事也蓋有
天道焉元有國百年史氏以忠信文學稱於時者甚衆
而祿位弗稱人事不冝然也是亦有天道焉元季兵亂
槐生於史氏之庭史氏里人曰是必有異既而槐死於
馬里人又曰是必有異未幾槐果復生南園中里人曰

前之異者微已往後之異者將來微之史氏殆有顯者乎入國朝史氏諸孫靖可以才見推為中書舍人出為泰州守遷肇慶通判前之言者曰是其微矣然而未也遂相與字槐曰靈槐而歌咏之靖可嘗與余兒璵同官謂余宜賦詩嗚呼天人之際遠矣觀於史氏又何其著明哉詩曰

難諶惟帝厥命孔赫鑒于九有顯相有德先宋九君既南而微微不遂傾世臣毗之世臣之家鄮山之下歲時

來歸旗節車馬馮軾而趨衮衣珮璫其綬伊何將相之
章雄城渠渠黎庶如雨相臣戾止耄倪咸喜豈無公侯
孰能後昆三相二王國存與存誰其尸之其德有始既
受多祐又有孫子鉅海湯湯朔風荒荒不淪于危不顯
其光孰云菑播而不有穫天將昌之嘉徵允灼崇堂有
庭其左有槐匪植而生惟德是培天實培之或戕于人
人力雖勞其能勝天南園牕牕有萌期藥其本如達靡
有摧害始軋而卑忽拔而穹其兆斯何宜卿宜公明明

天子俊又是使矧茲世家王公之嗣嗟爾君子天休汝
膺何以占之靈槐在庭

贈閻希曾參政山東詩

并序

國朝以魏晉以來立行臺省於外蓋為征討權宜之計
至唐末方鎮擅地遂以中書令同平章事命之至今相
沿而不革非所以示悠久乃改為承宣布政使司設使
一人左右參政各一人以協和庶政統馭人民河南閻
希曾由鄉貢進士擢為起居注皇上愛其才俊俾肄業

文華堂堂在禁中車駕時幸臨訓飭之尋除監察御史
轉司文監令乃授山東承宣布政使左參政希曾名鈍
仕學兩優者也因其嘗受經於予故其行也詩以贈之
其詞曰

山東鉅藩統府惟六民物阜蕃土地饒沃宸衷軫之百
司碁布誰挈其綱政乃無數乃詔近臣爾鈍爾往宣朕
至懷叅佐其長臣鈍曰吁臣恐弗勝方嶽重鎮厥任匪
輕帝曰俞哉爾毋固辭精白一心力行無疑鈍拜稽首

即日啓行君臣一心共底隆平我知閭子有學有文
五色燦然出類超羣子之往矣期建功勲貯見政績邁
于古人古人有云盡瘁國事子尚勉旃服之毋忒

五言古詩

凡二十七章

雜體五首

丹桃艷陽實移自武陵源柔風拂纖條鮮澤沃靈根吐
葩當春茂結實俟秋蕃盈盈大如掌有色極華丹衛之
不敢褻期以奉君餐君餐發靈和神滋生玉顏無為升

玄化玄默即軒轅

效顏平原

流幻百年中有如水中泡虛形本不實何以永今朝悟此造化意肆情常逍遙夜來風雨至南園秀芳條采之薦美酒斟酌樂陶斜川素心友叩關約遊遨相携步廣陌遂與品物交驚颺亂陵蟬墜照落巖猿歸徠枕肱卧遐思遡寂寥黃唐不我逮緬

馬心煩勞

效陶徵君

竹死不變節蕙焚尚餘馨秉性有恒操

徒計切

物非至

情左崦結層構中園穿空冥井花遙上白風影時獻青

築竈試丹訣濡毫騰酒經一為纓笏累累殊嗟神府局事
去慮將澹感來心已醒薨薨哀飢鳶累累嘆凍蠅逝將
命脩駕薄言旋故垌斟穰澆陽卉泛碧破陰革觀化驗
羣品褰襟咏三精情素諒已展爵服吾何營

效謝
臨川

周庭體王國漢制建神區環極法北辰玄英應蘿圖綺
殿祥飈轉丹闕寶氣浮象魏壓輦道獸環銜金鋪宮花
錦隊展御柳翠鑾圍長生臨宇縣億載握皇符琛贄九
夷集梯航百蠻輸天開睿情懌道洽臣節孚奉觴鳩鵲

殿奏疏承明廬元功在獻替昌言列都俞殷勤宣大雅

持用補嘉謨

效顏特進

少年趨京洛京洛多繁華迅河日流駛崇芒鬱魏哉宛
馬游龍行文軒流水過晨夕騁般樂張筵陳綺羅觀袂
濯曾澗行酒上陽坡宛轉七盤舞紫環北里歌中有巖
棲士如同顏闔家尋雲因剪木飲賓却寥蘿時盼城闕
中流塵深如何自咤逸德殷頗興賢達嗟及時不行樂

長有好客華

效鮑參軍

韶光將暮芳事未經托物念時濡毫成句

入春已三月不見曜陽葩有足限戶闔而能奪物華芳
林勵只尺憶車日來過縞李感明雪頰桃凝崇霞姦開
通鷺使暉媚促逢衙要友具嘉游豈乏玉鼻騮鈎白出
川曲采綠向層阿行樂固云得將軍猶枕戈

憶山中

平生絕俗尚幽期在一壑衙庖周曲記班坐蔭蘭薄日
嬌花欲笑風迅燕飛弱䟽峰挺飛莖平楚下飢鶴厓傾

石似行澗折泉如約何時脫塵鞅賦歸躡樓屨

浩懷

漆園欲齊物伯陽期守玄脩軌務絕絆冲志在潜淵夕
陰冥蕙幌晨陽暖石田外膠一以遣澹泊返自然五圖
非謬記九籀有真詮青青林間雨勃勃谷竇烟松華行
將熟米之釀紅泉

古辭四首

步月空階下蟋蟀迫人啼急扶叩竹杖越過畫樓西

登樓望南山山峰如髻了西頭雲起處定自故人家
誰家採蓮女面如白玉盤相對悄無語風吹荷葉翻
曉行秋川上無奈秋色何芙蓉難堪折却愁零露多

靜室二首

靜室似僧廬絕與黃塵隔引雀喜留忝惜苔懶穿屐有
時倚幽軒情境一何寂只有巖華飛隨風亦無迹
明月出東山照見西林明龍蛇布滿地欲步還自驚試
問夜何其鳥喧自知更誰探千載意寂然乃其情

題亭上壁三首

意隨流水行却向青山住因見落花空方悟春歸去
花飛豈解愁愁之損年華請觀未蕊時何處得飛花
山花招客笑山鳥喚人鳴相逢本偶爾花鳥亦何情

古曲

思君不可見忽見堦下花此花君手植如見君容華
嫣然索予笑不語意自佳花容方窈窕因君愈妍好
見花情尚多見君將奈何

曉行

荒雞一再號驅車事晨征寂寂秋風蕭況此華月明萬
頃琉璃中着吾一身行肝膽盡冰雪毛髮亦含情超然
鴻濛初頓覺百慮溟安得王子喬為言此時情

始衰

四時相推斥行年五十過觸心若無惊况復值春華良
節足游衍逝齡翻成嗟威眉拭花露按愁聆禽歌氣索
怯縮風顏凋仰流霞倚林思寢裊躑坡企行車志士惜

墜景達人傷逝波寧不動靈襟潸然下涕多人生大化
中飄蕭風中花百年終變滅感慨欲如何

寄遠曲

淚盡愁難盡燕歸人未歸遙知君念妾似妾憶君時

其一

憂心不可寫天際望歸舟江長望不極更上一層樓

其二

妾有五字詩寄君君勿忘十朝成一字字字九回腸

其三

關河勞夢魂欲見香難憑照君文繡帳相近不如燈

其四

遣興

鷄衣皆惡顏章紱無醜容容顏未嘗異人心自不同西
鄰起高樓妖冶街春穠玳筵陳圓方朝暮雜歌鍾東家
席為門著書述軒農豈能望膏粱糠覈亦不充一門軒
蓋集一門蠡罔空是非千載定奚恤達與窮

川上夜坐約王子充同作

四山動暝色紅日下蒙翳川光生夜明一白欲無地星
斗可俯拾恍疑青天墜曠景與心涵直接溟滓際若非隔
林鋸不知有人世

病懷

人生老須至在我不敢辭
老人多壽康我胡病擾之一
從嬰弱病筋力漸告疲
凌晨頻攬鏡且復傷鬢絲
固知非金石難可百年期
如何未五十摧塌已不支
豈非蒲柳質望秋輒先萎
歷觀宇宙內氣化相推移
試求古賢豪存者今為誰
當知事必爾奚以嗟嘆為
兒童種旅葵芳葉正參差
南風一披拂流光欲生輝
玩之百憂忘濁醪聊自持

望鍾山作簡周先輩

有序

春旭載和鍾山在望道光泉之嫩碧宜燕朱湖洞之飛
丹可尋爰憶舊游輒形新咏不慚下側以豔高情云爾
鍾山苑如沐綉嶽孕春饒生黃歸灌棠駭綠亂陵苔谷
沸桃雀集飈迴川景嬌茲今愧畜軫宿昔憶聯鑣陟峻
鼻生火酣芳臉帶潮詩情霞間迴酒纈望中銷偏憐晴
蘿思長麗涼月宵文園病渴吻沈生減圍腰江表周公
子華采雙鳳翹逸興如遙舉相隨擷鞠苗

題方方壺畫鍾山隱居圖

余十年不作詩見方壺子此圖不覺逸興頓生會仲脩
求題忻然命筆第塵土襲人者久殊不能佳耳詩曰

飄飄方壺子本是仙者倫固多幻化術筆下生白雲白
雲縹渺間拔起青嶙峋似是朱洞笙鶴遙空聞豈無
許飛瓊烹芝喻華芬鍊師從何來面帶山水文相期守
規中結庵在雲村心游帝象先神棲太乙根我啜上清
訣衛以龍虎君內涵玄命秘一氣中夜存行當去採藥

共入無窮門

題新竹圖送張齊賢

三章
并序

齊賢鄉尊丈夫春秋之高今躋九十誠邦家之人瑞州
里之禎祥也慶旦將臨預繪新竹圖于扇以為壽且侑
以詩三章一章美其德二章期其年三章願其後之華榮
也里中子宋濂上

猗猗淇園竹寫之紈扇中持以奉翁壽期翁如武公
猗猗淇園竹閱歲常青青持以奉翁壽願翁逾百齡

猗猗淇園竹本根蔚且蕃持以奉翁壽顯榮多子孫

答胡將軍

將軍去征蠻軍氣如鷹揚寶劍白玉琬鐵馬青絲鞭旌
甲帶亮月笳簫激清商韓彭當後拒褒鄂作前行顧盼
多姿態出入生容光奮迅東海濱海水為騰驤定如漢
貳師去縛樓蘭王想見凱旋時橫槊賦篇章椎牛饗壯
士歌之侑行觴功勲名鼎鼎永世不能忘

示呂生

有序

六經之後幾無文矣近世學者專攻浮縟之章動以鼓吹六經為辭予實病焉因為呂生賦此以示能文者

呂生家潯陽昂藏若饑鶻持刺望門拜不復資介
紹手持縑囊書蠅頭寫芒渺病眼花暈生力覽始能了
詞鋒剛且銳無異鑄斯趙汙萊盡嫗劉廋芭植如旄風
枝動姍姍秋實垂嫋嫋豈比稗與萑難復稱春搗似爾
才思多堪為世珍寶文華固交絢荒志咎非少憶當弱
齡時頗亦耽葩藻精神應冥會合夢吞羅鳥射侯抗熊

猗萬舞持皇翽五采染夏翟三就薦周繅自謂頗俊爽
分得天孫巧俯視佔畢徒孤篁出叢葆有時被餘酒便
指腹為藁莽蹄薄如葉鴉蚓恣揮掃春苑集穠豔秋陵
失乾薨下則陳姬周上復述軒皞古今萬沿革毫髮無
不考終焉立門庭焉敢望蒨笑古聖制為經白日行黃
道流行逮幽隱爛然天下曉誰騁螢燭微欲以闕玄造
若非靈臺昏致此明目眇昌以七尺軀不解分白皂末
俗狂瀾奔湖江決隄堡郊原化巨浸何地有桑棗魚鼈

舞神姦廬舍作洲島非加回障功未易就平燥祗緣正
學微本末遂顛倒邇來深知非筆硯稍焚燎遺經寘枕
傍寤寐事蒐討尚慚弓力微不足穿魯縞荏苒餘十齡
晦朔幾朏朏不見宗廟美憂心怒如擣爾才十倍丕雅
志復精暇當思不遠復改轍謝纏繞蒸沙豈樂飢裹糧
足充飽光廬長山東結蘭以為橈非獨繁牙籤亦自饒
魚稻念爾當何來相與探深窈躬行驗所知勿憚心形
勦翻翻逐時移毋類風中繇皮革可登器所貴在柔韌

大羽金衣猶亦務端其笥千里孰如遐舉足始一蹻煌煌作聖功預知此其兆勉旃復勉旃勿謂吾言耄

送門生方孝孺還鄉詩

并序

洪武丙辰予官禁林寧海方生希直以文為贄一覽輒竒之館寘左右與其談經歷三時乃去明年丁巳予蒙恩謝事還浦陽生復執經來侍喜動于中凡理學淵源之統人文絕續之寄盛衰幾微之載名物度數之變無不肆言之離析於一絲而會歸於大通生精敏絕倫每

粗發其端即能逆推而底於極本末兼舉細大弗遺見於論著文義森蔚千變萬態不主故常而辭意濯然常新衮衮滔滔未始有竭也細占其進修之功日有異而月不同僅越四春秋而已英發光著如斯使後四春秋則其所至又不知為何如以近代言之歐陽少師蘇長公輩姑置未論自餘諸子與之角遂於文藝之場不識孰為後而孰為先也予今為此說人必疑予之過情後二十餘年當信其為知言而稱許生者非過也雖然予

之所許於生者寧獨文哉庚申之秋生以不見大母久
將歸省焉予深惜其去為賦是詩既揚其素有之善而
後勗以遠大之業云詩曰

昔在詞垣時英材常駿奔水碧與金膏價重駭見聞終
然無根蒂歛散空中雲方生海上來玉栗而春溫袖携
絺繡書面帶黼黻紋揖遜入禮域陳義陵秋旻同餐太
倉米共勘典與墳潛將索幽邃穹欲攀嶙峋蹈雪忽言
別涉險航江津梅花似相憐沿途慰孤顰湛恩來九天

憫吾髮如銀特勅還故山許與烟霞親生聞抱經來處
此寂寞濱莽蒼叩太始溟滓窮無垠宇宙所管攝載籍
所敷陳鉅細鉤鉗之若大樂建均律呂按高下宮商肅君
臣宅和免慙懣疊奏歸繹純桑濮俟揮斥淫哇竟何存
黃鍾壓瓦缶庭燎滅荒燐似茲稽古力可敵龕定勲濡
毫寫雄顥勢欲移峨岷漏洩混沌竅出入造化神變幻
波起伏清溫玉璘珣盡抽神竒秘不墮鼻鼻同腐塵所以
日出之逾見光景新山鬼當灑泣湘靈且逡巡振古著

作家後先胡續紛豈知萬毛牛難媿一角麟古今二千
載有如星在辰豈意荒礫中獲此席上珍予生髮未燥
立言鄙河汾結交一世士暮齒越七旬妍蚩與苦良入
目無留痕自非病狂藥顛倒甲與種渠中切寧因一學徒
設辭浪云云大言心不忤祇為所見真生今有行期序
飲松竹根笑摘黃金花起泛青瑤尊酒酣雙耳熱劇論
如抽繯豈無贈別言有意須當遵真儒在用世寧能滯
彌文文繁必喪質適中乃彬彬有虞號多士九官展經

綸惟時亮天工外夷悉來賓不聞有著書鼓盪摩乾坤
生乃周容刀生乃魯璵璠道貴器乃貴何須事空言孳孳
務踐行勿負七尺身敬義以為衣忠信以為冠慈仁以
為佩廉知以為輦特立睨千古萬象昭無昏此意竟誰
知為爾言諄諄無徒謂強聒一一宜書紳

送李生還四明詩

有序

古者重德教非惟子弟之求師而為師者得一英才而
訓飭之未嘗不喜動顏色此無他天理民彝之不能自

己也予以一日之長來受經者每有其人今皆散落四方黍稷雖茫茫不如美稗之有秋者多矣晚得四明李生其爲人也凝重而不遷於物穎銳有以燭諸理間發爲文如水湧而山出喧啾百鳥之中見此孤鳳凰云胡不喜越一年別去感慨今昔又云何弗思退朝之暇懸鐙默坐因發於聲詩十四章以送之末章用來字者冀負笈重至以迄于有成也詩曰

北風何逶迤雪花大於手之子有遠役忍勸尊中酒

解

念子初來時才思若繭絲抽之已見緒染就五色衣

解二

被之行儒林孰不生豔慕蹉蹉媚學徒三步亦回顧

解三

余生老且至秋髮垂兩肩得之喜欲舞如獲寶璐然

解四

素編耽清晝青燈坐深夜玄欲忘寢薦味如啖蔗

解五

一朝別我去何以釋離憂不禁秦淮水流子江上舟

解六

但願逆風起吹舟不得往共穿鍾阜雲時看白石長

解七

風本無情物豈能知我心事既不能諧贈言如贈金

解八

須知九仞山功或少一簣學功隨日新慎毋中道廢

解九

羣經耿明訓白日麗青天苟徒溺文辭螢爝欲爭妍

十一解

姬孔亦何人顏回了不異肯墮盆盎中當作瑚璉器

十一解

不見金谷園瓊芳委塵沙泰山有喬松老幹凌蒼霞

十二解

四海皆兄弟知己獨難遇伯樂儻弗逢鹽車厄騏驎

十三解

明年二三月羅山花正開登高日騁望遲子能重來

十四解

送黃伴讀東還故里

并序

瀟黃文獻公老門人也嘗恨無以報深恩一旦諸孫祖

從余學經為之喜而不寐會其還家覲省賦詩十四章

為贈然絕吟事者已十餘年矣詩曰

我昔弱齡時輒侍而翁游經畝日耕藝圃兼旁搜泰山一以頽欲往將安從豈意麒麟兒復出湖水東爾年踰二十文采昭清秋燦燦五色錦孰肯寘道周一朝捧貢函羣彥讓先登氈墨新題處祥雲為之升南宮雖免試成均復漸摩庭中傳且葉幾見寒雨多天子坐法宮詔繙金匱書爾獨當青年執筆與之俱九年游降勅持經贊藩王出入禁闥中衣分泥水香有時獻新文跪誦

黼宸前帝曰爾小臣才思何蟬聯聲名落人間一如潮
水生蛟龍助氣勢坐使汀洲平雙親在烏傷不見今三
年青官為奏請即日乘舟旋顧我髮種種與爾會神京
懸鑑青照夜不翅父子情別言不忍出况復為新吟吟成
意莫盡一字一寸心別去明早來立業繼而翁翁名亘
天地不見初與終持此贈爾行櫂發龍江廩官書有嚴
程勿戀故山薇

贈劉俊民先輩

劉君卓犖士出自詩書胄眉目儼如畫幽花眩晴晝踉蹌忽
來謁進退頗溫茂自言宅偃師家昔千金富大父名法從纍
纍印懸綬文辭補元化求者輒奔走繼此簪纓餘矜莊事雕
鏤無食不鳬翠有衣總文繡蘭舟盟津水蠟屐穀城岫或騎
紫騮馬深林出從獸黃鬚年少兒執矢利先後一發巧中肋
驪聲溢郊園狼兔懸寶鞍歸來薦清酎燕姬白如雪時唱清
角侑人意天上郎雌伏不敢雌一旦黃金盡其事乃大謬漁
樵來爭席僂僂或昂脰憤來氣屢絕十起九顛仆折節去讀

書攻苦分句讀初如蛇入筒漸類雛脫殼把筆學為文衆色
紛來就又恐誤儒冠雜藝亦兼究雅奏辨宮商古文參篆籀
六物推休祥八卦占爻繇更參九箴法俞穴別膚腠圍
碁與握槊賭勝欲起鬪不覺疾聲呼有若熊虎豹最便
結風舞唯恐技難售偶逢玳筵張肴核列飣餼酒酣兩
耳熱徐起整衿袖文鸞側鞞翎皓鶴仰褰囑躡節盼盤
鼓廻旋逐音奏雖得諸工憐不博兩眉皺使者天上來
會合誠邂逅負書亟從之何翅杵投白三河及幽并無

地不馳驟登高或弔古感時更懷舊恨無息肩所若沉
痾待灸前年往龍漠氣序異常候八月雪即飛一夜三
尺厚今年度庾嶺熱氣甚蒸餽老梅雖未花鐵幹倚雲
瘦欲俟喘息定陰厓聊宿留土虺長過竹矯首出嵌竇
目光夾明鏡鑠我汗如漚閉目但待啞有術不暇呪性
命鴻毛輕幾被山鬼蹂年來自懲創此險安可復俯思
十載間行事賤如畜徒然名悲辛寸祿焉能就即將巢
雲松終老友猿狖予聞心鼻酸宛若身在疲于時十月

交日月會龍猶霜風吹人急層衣悉穿漏百齡俱過隙
胡不重棲宿須知學踐形庶不慚載覆勺水當離尊贈
詩比糧糗歸歟勿久留吾言不能又

寄方編修以愚并簡徐大年

方君足文史二十即決科州縣治文劇史館仍編摩須
知軒冕榮莫換山水癖釣清一川舟攬翠千峯屐豈徒
糜歲月且復註春秋書法嚴衮斧箋記分薰蕕雖然落
湖江政自憶京輦雪盡馬蹄乾花簪貂帽淺十齡不能

見一旦忽奇逢楚澤蛟龍雨秦淮鵬鷄風紅燈夢未殘
明月家何處典衣沽酒別蹈雪騎驢去忽忽千里意沉
沉三月餘可憐天邊鴈不帶山中書懷人隔秋水題詩
寫山石若見徐徵君須言共相憶

游仙篇贈鄧尊師

并序

往歲鄧尊師以高行道士被召至京寵遇優渥遂留主
祈禳之事蓋尊師通混元大道而尤加意九還寶丹之
法數著奇驗役使鬼物特其餘技耳於是不還龍虎山

中者頗久儀曹以其事上聞詔許之尊師來別且徵予
片言夫道貴於無名奚假言宣哉予方溫繹真誥輒擬
羣真唱嘑之體造一章以遺之方壺真人必輒然笑云
是夫也何其狡獪之若此耶詩曰

真人契玄冲翩翩冷風俱游行一氣中流耀周八區丹
雀銜白環來授寶秘圖內感炎靈方欲采三素腴鍊成
赤明液鬱華凝黍珠蒼龍為濯氛上玄來辟非將期學
真侶度之升紫虛自知滯塵凡何能應玄符頗聞琵琶

峯肉芝發瓊琴玉掌如嬰兒烈日暴不枯定當分刀圭
成此列僊儒

送黃尊師西還九宮山

并序

雙井黃尊師中理文節公庭堅之八世孫也年弱冠以
門資為光之固始尉尋患半身不遂棄官來歸有神師
號金華君者謂曰吾能療而疾疾愈當為道士弗聽吾
將去尊師曰儻能起廢疾為全人敢不受命金華君以
帛粘其體燭燈徧灼之越七日起行尊師曰神師之言

猶在耳也小子其敢忘乃去學老子法於欽天瑞慶宮
宮在興國九宮山上即真牧張真君道清鍊丹之所居
十餘年遂主其徒凡一千人咸服其教恂恂有道待當
皇上西平江漢尊師拜迎於鄂應對稱旨後八年上思
其人復召至南京所以寵勞者甚至既退命儀曹設宴
享之薦紳家以為尊師幸逢盛際上簡主知龍光赫絕
山中泉石當被餘輝而綽有喜色不可無咏歌以誇張
盛美其西還也相率賦詩餞之而請金華宋濂予之詩

曰

崔崔九宮山翠蕤倚層青飛觀峙後先宸奎爛晶熒中
有遯世翁霞衣佩葱珩仙徒一萬指執簡聽使今年來
遯兵燹散走如流星翁獨牽青牛尋雲自躬耕翠華幸
江漢扈從森幢旌俯伏黃鶴磯再拜陳中情天日下照
臨簪裳受餘榮今又奉璽書翩然覲神京太官給珍膳
法酒雙玉瓶祇因逢景運重瞻泰階平致使方外士恩
寵霑鴻靈一旦賦歸歟行裾逐雲輕自言當弱冠綠袍

佐山城風露感末疾離家煉黃寧藥烹日月鼎符參龍虎形
經中氣象昭玄覽極窈冥欲期起泥丸神飛出孩嬰
名花滿皇都春風語流鶯景氣非不饒歸思竟纏縈芳
歲去如矢逝彼日堪驚純陽一銷鑠重陰遂相乘余聞
重自媿顛毛類枯莖逐物尚役役棲身亦烹烹幸有一
寸丹能與萬化并何時滴秋露相期註黃庭

俚詠寄義門鄭十山長叔姪追述嚴陵別意

結髮與子交二十又五春手足雖殊體肝膽寔同身朝

帷接觴翰夜幌抱衾裯殷勤忠款意寂寞采真遊親暱
物所忌一旦忽東西剛腸固無淚不覺萬行啼子時惜
我出錢至澈溪濱離家二百里不忍兩相分情深忘道
遠猶謂咫尺間行將過嚴瀨勒轡子當還子方執手泣
胡可便睽離中情一如河東流無止而流水到海止唯
潮兩度來將心比潮水一日幾十迴欲別不成別背顏強
登舟子騎白馬去十步九回頭出倚颿柱望望望苦逾
濃馬首出復沒漸入烏龍峯峯高在天半未晚涵日車

巖阿人已隱恨不鏟嵯峨身雖逐棹發魂則隨子征暝
泊蘆花渚寤言呼子名迤邐向前馳徘徊宣歙間李白
題詩處蹋蘚升孱顏升高欲為樂念子翻成愁想子已
抵家伯仲聚綢繆自此積繁思思繁如棼絲柰何三月
久不得子音微客鴻未返塞夜鵲尚飛南徧辭寫中悵
一歌百慮覃

題玄麓山八景

有序

予不作詩者十年近尋蘭至玄麓山左泉右石爭獻奇

秀疑山靈欲鉤致新句故使人情思疊疊然也因賦詩
八章用元漆書諸崖石別錄其副以俟同然

桃花澗

桃花滿靈澗樹老不計春白雲如可問為覓種桃人

鳳簫臺

簫史去已遠朱鳥不下來幸有山頭月憐來入酒盃

釣雪磯

釣雪立蒼磯入夜魚不食不食非水寒自是釣大直

翠霞屏

古石不改色絳綠自成圍誰裁一片霞為我製秋衣

飲鶴川

渴鶴忽飛來愛此一勺清五湖非不多恐染鳬鶩腥

五折泉

一汲復一汲有若步雲梯終然投東意萬折不肯西

飛雨洞


飛泉灑成雨洗盡塵土胃欲持青芙蓉去滔赤鯁公

蓋珠巖

吟上蓋珠巖詩成不敢寫疑有綠毛仙洗髓梅花下

別義門

平生無別念念念只麟溪生則長相思死當復來歸



文憲集卷三十一

欽定四庫全書

集部

文憲集卷三十二

詳校官中書臣吳璫

中書臣劉源溥覆勘

總校官降調編修臣倉聖脉

校對官編修臣章宗瀛

謄錄監生臣朱汶

欽定四庫全書

文憲集卷三十二

明 宋濂 撰

五言律詩

凡一章

題李息齋竹

方存雅題詩其上

別駕聲名遠先生節行尊百年耆舊盡二老典刑存已
返遼城鶴難招楚客魂人間留翰墨不獨重璵璠

五言長律

凡一章

玉兔泉聯句 有序

洪武五年秋九月十又五日日入酉予與仲子璲過張
錄事孟兼於成均秉燭對坐孟兼方命侍史汲玉兔泉
淪茗俄熊叅軍鼎劉職方崧周虞部子諒皆集相與談
詩至愜心處輒抵掌笑譁呂太常仲善聞之亦驩然來
會既啜茗已孟兼出新造玉兔泉銘諷之且曰今夕何
夕勝友如雲不可無以為娛請舉泉聯詩何如衆皆曰
然予年有一日之長俾題其首句餘則以次而續鬪奇

據勝關關弗能休至二鼓詩成各擁衾就榻逮雞再號
風雨淒迷僕夫載塗官事有程皆不告而散予亦騎驢
去朝天矣明日孟兼將屬璫作小楷繫詩於銘左徵余
為之引於戲人事聚散如中風飛矢其回旋飄泊曷嘗
有一定之跡今幸得與二三君子岸幘咏詩輟然而一
笑豈非天哉然此七人之衆楚產者大半獨予父子與
孟兼居越西相距僅半舍他時或後先投簪而歸支九
節筇訪孟兼白石山房遡咏諸賢立霄漢上欲一見不

可得取此卷閱之恍如聚首成均時寧不有慰於寂寥
之鄉也邪孟兼子諒皆以字名熊君字伯頴劉君字子
高予則南宮散吏金華宋濂也詩曰

成均地何靈聖澤資灌沃

濂

兔奔北竒徵井渫廢新劒

鼎自非三窟深孰湛一川綠

孟兼

儲精本從金生色絕勝

玉子諒霜毛蘸寒飲雪毳翻夜浴

崧

釀冽補酒經沐丹驗

仙籙

仲善

杵椿蟾宮棄珠噴鱣堂觸

璣

孕月生陰精觀天

漏晴旭

濂

冰澄毛骨豎鑑徹鬚耆燭

鼎

號名徒自竒獮

行穢難贖

孟兼

雖涵東郭狡難洗上蔡辱

子諒

引滿瓶未羸

探幽綆頻續

崧

流瞿滲銀牀出竇濺瓊粟

仲善

醉沃目暈

花凍汲指連瘰

璣

濡毫乃自潤照影從人欲

灑光沈天

上魄祥啟地中躅

鼎

摛辭挹餘清盥薦侑嘉告

子諒

劍刺

非貳師池移豈身毒

孟兼

燕支媿淫陳鹽鹵鄙富蜀

崧

不

動疑窪雪頻搖笑風蠹

仲善

天光一眼開雲影片鱗束

璣

劇噉覺瘰瘰蹶足想彳亍

灋

威沸虎爪跑齏吸獺臂數

鼎

潔士濯冠纓渴卒卸刀韞

子諒

精當昂君降液或井宿

督

孟

誰知鍾宿分脉與伊洛屬

崧

錫名爾固嘉戰句吾

何局

仲善

聯將指鼎比疾勝擊鉢促遜驚風落燈燼斜月

墜檐曲靈源詎能窮

闕

七言古詩

凡十五章

題宗忠簡公誥

王黼時為少宰書名誥上

青城妖祲連雲赭瞻烏靡止龍在野百年藝祖舊河山
萬騎長驅若冰解京城留守一世豪仰天雪涕風蕭騷
起扶日照河北赤手欲障三秋濤義旂戛天天為泣

四方猛士聞風集自期徇國與天通豈謂忠言反難入
披肝上疏留至尊乘輿不顧東南巡拊牀三叫大星落
非天棄宋良由人功業無成志可紀古來英傑多如此
君侯心事漢武侯偉氣英聲冠千祀我來已恨王世遲
不得親觀忠勇姿每過鄉邑髮猶豎綸誥況是當時為
却憶前朝司馬死章蔡羣奸乘間起國雖未亂政先亡
萬里蒙塵從此始吁嗟黼華真奴臣賊君致寇肥其身
姓名汙眼尚欲嘔君侯在位能無嗔侯乎侯乎慎勿嗔

誰使彼奴操國鈞君不見汴京禮樂正全盛江南杜宇
啼天津

題李廣利伐宛圖

貳師城頭沙浩浩貳師城下多白草六千鐵騎隨將軍
風勁馬鳴高入雲師行千里不畏苦戰士難教食黃土
上書天子引兵還使者持刀遮玉關烏孫輪臺善窺伺
宛若不降輕漢使璽書昨夜下敦煌太白高高正吐芒
戍甲重徵十八萬居延少年最翹健殺氣漫漫日月昏

邊塵冉冉旌旗亂
水工決水未絕流
旄竿已揭宛王頭
執驅校尉青狐裘
牝牡三千聚若丘
惜哉五原白日晚
郅居水急游魂返

題段將軍征羌圖

西域都護多男兒
護羌校尉仍出師
生羌八種來寇塞
白劍欲接雙龍飛
凡亭山上血漂杵
奢延澤中鬼應語
至今有花皆成丹
疑是當年血未乾

題花門將軍游宴圖

花門將軍七尺長
廣額穹鼻拳髮蒼
身騎叱撥紫電光
射獵娑陵古塞傍
一箭正中雙白狼
勇氣百倍世莫當
胡天七月夜雨霜
寒沙莽莽障日黃
先零先奴古黠羌
控弦鳴鏑將跳踉
將軍怒甚烈火揚
寶刀雙環新出房
麾却何翅驅牛羊
平居不怯北風涼
白氈為幄界翠行
銅龍壓脊雙角張
綵繩亘空若虹翔
將軍中坐據胡牀
熾炭炙肉泣流漿
草囊桐酒葡萄香
駝蹄斜割勸客嘗
趙女如花二八強
皮帽新裁繫錦鐙
低把琵琶彈鳳凰

半酣出視駝馬場五花作隊滿澗岡但道驩樂殊未央

題李太白觀瀑布圖

長庚煜煜天之章精英下化為酒狂匡廬五老森開張
銀河萬丈掛石梁下馬傲晚立欲僵聳肩袖手神揚揚
憶昔開元朝上皇宮中賜食七寶牀淋漓醉墨蛟龍襄
人疑錦繡為肝腸麾斥力士如犬羊營營青蠅集於房
金鑾不復承龍光并州可識郭汾陽不可丹陽逢永王
大風吹沙日為黃狻猊哀啼聞夜郎蒼天欲使詩道昌

頓挫萬物歸奚囊何處更覓延年方北海天師八尺長
芙蓉作冠雲為裳授以薤筴青琳琅蓬萊屹起瀛海洋
羣仙遲汝相徊翔誰將粉墨圖縑緗顧我一見心徬徬
詩成仰視天蒼茫夜半太白生寒芒

題李西山古木圖

營丘雲昏朔風急老蛟墮地作人立震雷怒電破杳冥
山鬼野狐皆夜泣李侯城南射虎歸手裂生綃吞墨汁
狂呼袒臂寫此圖雲霧晦冥元氣濕回看荒原萬枯樹

顏色慘澹神盡哉乃知妙奪玄化功庸史如林豈能識
當時二李如二龍謂西山父子俊氣英聲動都邑百年災變
不須史驥去圖存安可繫君不見風流人物今已徂豈
特丹青絕代無

題李易安所書琵琶行後

有序

樂天謫居江州聞商婦琵琶技淚悲嘆可謂不善處患
難矣然其辭之傳讀者猶愴然況聞其事者乎李易安
圖而書之其意蓋有所寓而永嘉陳傅良題識其言則

有可異者余戲作一詩正之於禮義亦古詩人之遺意
歟其辭曰

佳人薄命紛無數豈獨潯陽老商婦青衫司馬太多情
一曲琵琶淚如雨此身已失將怨誰世間哀樂長相隨
易安寫此別有意字字欲訴中心悲永嘉陳侯好奇士
夢裏繆為兒女語花顏國色草上塵朽骨何堪汙唇齒
生男當如魯男子生女當如夏侯女千年穢跡吾欲洗
安得潯陽半江水

送錢允一還天台 并序

皇帝即位之二年秋八月大將軍帥師取燕都西北州郡次第皆平而天下歸於一統越明年之冬上將親御衮冕郊祀天地大告武成復念開國諸臣勞烈之多錫以鐵券以申河山帶礪之誓前一月下禮官議其制度近臣奏言唐和陵時嘗有賜於錢武肅王其十五世孫尚德實寶藏之上遣使者即其家訪焉尚德既奉詔積券及五王遺像上之上御外朝與丞相宣國公臣善長

禮部尚書臣亮主事臣肅觀之皇情悅豫敕省臣宴尚德于儀曹恩意有加焉已而尚德東歸陛辭之日命還其券與像以禮敦遣之予時待罪禁林尚德以余知其事頗詳請序其故而繫之以詩夫錢氏寶有此券已五百載宋淳化中杭之守臣嘗連玉冊進之元豐五年又進之宋季兵亂券沈官渭水中者五十六年元至順二年漁人獲之而售於尚德之父世珪迄今有道之朝而尚德又進之是嘗三登天子之庭其間或顯或晦雖若

類靈物訶護之亦其子孫之多賢始能保守而勿墜也
歟抑余聞武肅之有國吳越同時據有一隅以專威福
者若前後之蜀南北之漢以至吳楚閩唐南平號為十
國計其士馬之精疆城邑之壯麗府藏之充物意盛氣
得亦可謂一時之雄曾未旋踵夕陽芳草淒然有餘悲
矣況望其子孫保其故物於十餘世之後乎由是觀之
錢氏之樹德也深矣皇明肇造區夏比隆唐虞凡前代
文獻之可考者莫不訪求之尚德之家世載明德且將

出躋膺仕以佐明時斯券之徵蓋特為之兆爾予因不
辭序而詩之于以見尚德遭逢之盛未止於此而他日
相遇必當以余為知言云尚德字允一天台人詩曰

大明天子開鴻基雄兵百萬皆虎貔東征西討十餘載
變化不異雲雷隨功成治定四海一剖券分符恩澤施
前王遺制久已泯錢氏世寶猶無虧天使持書徃征取
有翁橐負來丹墀鞠躬俯伏再拜起旋解韜籍重重披
精鐵煅成大逾瓦中突傍偃形如箕又云玄獻剖其半

一片玄玉誰瑕疵鑿窾填金文絢爛筆畫方整蟠蛟螭
誓辭三百有餘字河山帶礪無嫌疑繼陳五王有真像
髣髴猶是唐冠衣腰圍白玉金作鐙吻角左右分三髭
重瞳回光屢下照笑語逾覺天顏怡便敕大官給珍饌
上尊法酒澆瓊卮憶初唐綱既解紐恣舞鰭鱣號狐狸
斗牛王氣果凌厲豫章占術元非欺八都健卒猛如虎
指揮不異丘嬰兒羅平烏圖騁怪幻內黃外白跳狂癡
龍劍一揮赴水死大勛星日同照垂因茲錫券代牲敵

彭城開府如三司衣錦城空嘉樹老共守尚有三樓危
淳化元豐兩進入龍光曾受天王知炎精訖錄九鼎沸
一旦失去官河糜豈伊神物欲變化相逐雷劍為龍飛
孰知漁者一舉網所獲非鼈還非龜終然鬼物所訶護
不使光彩埋荒陂泥塗沙礫幸免累寶玉大弓欣有歸
我知天意寔有在武肅弘烈何堪微八州生靈數百萬
拔出水火行中達子孫食報豈終極政如稼穡隨年肥
高牙大纛入黃閣金章韞綬趨彤闈不知堆牀定幾笏

但見肘印懸纍纍七世珥貂未足擬一門三戟終前衰
況翁文采爛五色嗜古不管頭如絲秦淮呼酒話離別
遠盼官舸如星馳于時同雲羃四野勢欲釀雪增寒威
行行若過表忠觀好剔蒼蘚看殘碑

灘哥石硯歌

并序

朱舍人芾雅士也近見灘哥石硯禁中遂摹榻一本裝
褙成軸懸之書齋命予作歌填其空處歌曰

朱君嗜古米黼同三代彝器藏心胸灘哥古硯近獲見

驚喜奚翅逢黃琮研煤敷紙巧摹榻訪我一陳始終
有唐四葉崇象教梵僧航海來番禺手持貝葉寫健相
翻譯華堂談玄空辭義幽深衆莫識當時授筆唯房融
硯中淋漓墨花濕助溟真乘誠有功愛其厚重為題識
七月七日元神龍鬼工雷斧琢削古天光電影生新容
裛將四尺廣踰半作鎮弗遷猶華嵩涉唐來宋歲五百
但見寶氣浮晴虹南渡羣公競賞識氏名環列縈秋蟲
朔元雖以寶內府棄寘但使烟埃封方今聖人重文獻

羶蒙舟載來江東風磨雨濯露精彩奉敕昇來文華宮
宮中日昃萬幾暇侍臣左右咸雲從紫端玄歛盡斥去
欣然為此回重瞳重瞳一顧光照日天章奎畫分纖穠
有才沉埋恨已久石如能語誇竒逢維昔成周全盛日
允戈徹衣并大弓藏諸天府遺孫子用以鎮國照無窮
願將斯硯傳萬世什襲不下古鼎鍾上明文德化八極
下書寬詔蘇疲瘡君方執筆掌綸誥願以此言聞帝聰
老臣作歌在何日洪武戊午當嚴冬

望僊引

橫塘風斷愁紅淺
舊燕銜春香滿滿
鶴馭遙空不可攀
繡宸斜張香夢懶
暖簫不到茱萸帳
寶露空漙五雲盃
風前白鬢幾人悲
萬里青蘋一時晚
銅僊含淚辭青瑣
渺渺空嗟西日短
弱川無力不勝航
騎龍難到白雲鄉
玉棺琢成已三載
欲葬神仙歸北印

陶冠子折齒行

陶冠先生家海壖
王作牙齒白且堅
非惟硬餅似刀截

左殺右截咸能穿一朝怪事發坐側狂童酗酒步若顛
手揮山斧作狸舞縱橫奮擊何喧闐先生驚起急驅過
眼花落井無由悛當時月黑不辨色誤落兩齒聲鏗然
先生大痛幾欲絕吻角流血如流涎掀呀口中開穴竇
唇齧一鼓風翩翩譬之連城列埤現正陽雙玷功非全
咀華從此憚強勁却愛芳脆柔於綿酒醺刺刺論世事
宮徵未必能清圓東閭西井走相唁先生便可總煩悵
跛足男兒尚節度折臂刺史居台躔但得錦心繡腸在

何憂健翮難飛騫先生聞之只大噓誣辭奚用來如泉
柔存剛缺古所戒昭晰不異明星懸余生褊迫與物忤
藉此為鑒期無愆兩間分付妙不測神奇臭腐相縈緣
但涉形形盡粗穢縣解定屬虛無先須知無趾別有趾
外累皆撥蟲能天憤白人育寧足慮禍福相倚誠幽玄
江城五月藕花發花氣蒸雨濃如烟且沽美酒對花飲
正有三百青銅錢

涼夜曲

紅爵綠疏回曉光翠睂雪肌凝白肪蟬衫麟帶結寶璫
吳絲蜀桐啼鳳凰盤龍蘭鼎生暖香桃生豹枕展曲房
夫君不來涼夜長

鴛鴦離

結髮成昏期白髮誰道鴛鴦中道拆妾身雖作土中泥
妾覓長與君同棲娶妻祇為多似續妾有三兒美如玉
願君勿娶全兒恩一娶親爺是路人

病疔新起

歲在彊梧大淵獻獨螫衡門悲逝景瘡鬼胡為苦見讎
使我枯腸益悽哽初疑筋骸稍鉗束引臂噓呵絕馳騁
須臾顛掉力弗禁齒牙下上聲相並蒙戎雖有狐裘溫
浼洗何殊冰筋冷寒衰熱壯慘尤極百束薪蒸燃九鼎
煨膏鑠髓無不到高及頭顱卑脚脛四支似石下深潛
一氣如塵寄寥邈自憐性命此日捐孰料平寧在俄頃
起來盥濯把明鏡冠帶臨風且重整扶藜忽過百花園
無限晴芳到隣杏燕支甕煖蠟凝春錦繡機翻紅暈影

誰將生火鎔豔陽滿樹無烟光頰頰更疑神女會宓妃
燕罷瑤池酒初醒血色羅裙尚舞風向人却妬晨粧靚
對此閑愁盡斂藏有似投簪訪箕潁誰知鬢髮綠如雲
轉目霜蓬已垂領多少東華塵土客營營至死無由省
韋平荒冢生黍苗褒鄂枯骸宿蛙黷無花必用強追尋
有酒何妨長酩酊題詩一笑鬼應聞定引川妃安溟滓

陽翟新聲

同

朱定甫賦

四首庚辰春作

別苑靡蕪弄小花平洲蘋蕩開輕牙春風如水極搖蕩

流入天涯不識家。網軒棲塵遠，凝紙青鳥不來紅樹死。
雄鸞雌鵲此日分惜殺，嬌魂過遙渚，隔簾花影望微月。
鸞橋似度龍綃，鞦韆倏無忽，有情奈何淚灑杜鵑枝上血。
碧簫曲歇粉痕灰，紅蜘蛛絲結鏡臺，望極官河斜雨外。
時時疑是翠車回。

黃雀風長雨洗枝，丹魚出水赤光肥。遙天寥海絕行跡，
翠減紅銷知為誰。曲閣香凝龍氣暖，膩葉蟠花帶雲淺。
正是雙蛾巧喚愁，欲斷應憑胡燕剪。滴淚和泥封錦書。

書中一字一行啼莫恨鯉魚紅尾短隨波好送到遼西
感血雞頭徒若沸紺房蓮子光細細折蓮寄遠被絲牽
舞鸞却識蓮中意

露漬銀牀金索冷明月不言星靨靨御街朝馬響纓鈴
幾樹梧桐鴉影淡暗拭衰紅出綺房無心宮額貼花黃
秋裳未結鴛鴦縫交刀裁破一簾霜昔日翠翹今白葆
可惜韶容鏡中老縱使青天不解愁涼榭芭蕉泣秋曉
蘭燭啼紅愁夜闌江南清怨屬哀彈挑鬟斜凭玉欄干

報道金籠鸚鵡寒

鎮帷犀重鮮室溫白天碎碎玉花紛窻開雲母不知夜
帳結流蘇散錦文盈盈小妾被流黃抱瑟升樓發浩倡
銅龍漏極曙光動驪絕竟忘寒夜長祇恐愁紅向春死
不死應須探春髓龍刀切紙印冰花貼在九華顙臂裏
冉冉南光走冷圭梅含春影與雲齊青絲玉壺具顚顚
井底生塵却解攜

七言律詩

凡四章

和王內翰見懷韻 并序

余與王君子充舊同鄉逮入國朝同官翰林同總裁元
史史成子充出使甘肅又使西南夷久而未還余尋以
年高納祿歸金華獨游山水間追數平生故人未嘗不
深念我子充也去年其子紳以子充往甘肅時道上寄
余詩二章求和久未能成今聖天子敷大惠於四海與
斯民更始蠻夷之長庶幾感化請罪闕下而子充亦殆
將來歸耶此余之至願也次其韻以致斯意以示知子

充者洪武十三年七月十一日同郡宋濂

帝德如天覆萬邦定期歸棹到龍江奇才不換金城百
寵命當簪白筆雙喜極欲持如意舞醉來應使軟輿扛
此情縱切何由遂吟對西南月滿窓

才名老去愜休官聖澤高深只自歡侍宴每容親繡袞
從遊偏許近和鑾久知琛賫來殊俗漸喜寰區洽治安
惟有張騫猶未返玉關秋早節毛寒

王內翰詩附

芙蓉峰下是鄉邦未許歸帆泝浙江天下文章寧有幾
斗南人物恐無雙心期久與三乘契筆力真能九鼎扛
投老著書渾不倦頗聞中夜坐燈窓

同門同里復同官心事相同每共歡袞斧並操裁玉牒
絲綸分演直金鑾名齊伯仲吾何敢義重師資分所安
重會定知頭更白肯令歲晏舊盟寒

和鄭博士見贈韻

秋霜染得鬢成絲祇為烟霞勞夢思誰料杜陵垂白髮

得同鄭老合襟期
荷衣荇帶煩新製
澗草巖花逞故知
便欲從君同點檢
歸裁冰繭寫成詩

走筆送金賢良

飄零已覺二毛侵
且向西風問苦吟
蜃雨蠻烟十年夢
龍韜豹略一生心
星垂鍾阜知天近
水入秦淮似海深
不是秋帆連夜發
典衣呼酒共登臨

七言長律

凡四章

思春辭

丙申
春作

美人別我城南去幾見樓頭涼月生南浦沈書尋素鯉
東風將恨與新鶯丁香枝上同心結九曲燈前白髮明
花託芳魂隨鵲夢草移愁色上簾旌物華半老燕脂苑
春影輕籠翡翠城歌扇但疑遮月面舞衫猶記倚雲箏
因彈別鶴心如剪為妬文鴛繡懶成宮燭不啼偏有淚
湘桃無語自多情岩南樹密晨鳥集江北潮回暮渚平
幸有夢中能聚首喚醒恨殺短簫聲

和鄭奉常先生讌集詩韻

我生空負月臨奎

余生辰月直奎宿
占者為文學之神

文學何曾遂昔期

柳子未成非國語匡衡徒患作人師探珠赤水欣同調

結屋青蘿得所依泉石要為中世托姓名豈料九重知

東西御饌嘗分賜出入天門更不疑虎籞秋嚴威閃閃

龍樓日轉影祁祁年華自覺隨流水造化誰言類小兒

別夢屢形分講席歸田一似舊游時常隨采藥衣霑霧

幾度尋花屢帶泥投老幸知同臭味此生端不慕輕肥

芳筵夜秩枯行數絳燭春融客醉遲一代耆英都在坐

百年文獻欲還誰獨憐
鄴下支離叟莫鬪長安絕妙辭
賴有西風吹酒醒搔頭向月謾賡詩

和蘇編修游東明山詩

東明勝槩實佳哉圖畫天然八面開
雲影入簾紛似絮
巒光染袂綠於苔
學書猶憶臨池寫采藥曾經帶雨栽
祇為魚龍期變化致令猿鶴互驚猜
數莖白髮雖侵鏡
百鍊丹心不作灰
中使傳宣承顧問東朝進講每低徊
月移禁掖藏書署花壓瀛洲視草臺
豈意衰齡需異渥

因茲勝賞得重陪
丁寧杉桂無奇句
約束東溪山屬駿
才倚杖指林尋故跡
賜衣濕雨借新焙
名編述玩叢如筍
嘉卉當筵粲若杯
松鼠沿窻行且偃
山禽窺客去仍來
但知笑齒時頻啟
何事愁腸日九回
寄語山靈休厭我
看花莫待作詩催

和劉先輩憶山中韻

憶昔山中鍊九陽
山頭旭日正蒼涼
鳳笙吹煖雲中火
龍藥凝成鼎內霜
靈戶啟扃森虎籞
中房持戟混桃康

山分秋色侵玄鼈。蝸學天書篆敗墻。五鳥花開呼鹿守。
千齡桃熟通仙嘗。伐毛定欲追神女。歌鳳誰能笑楚狂。
種得神瓜如盎大。養來瘦鶴似人長。樓延虛顥殊庭上。
樹蝕蒼霞曲瀨傍。劍氣尚堪吞鬼伯。詩蒐端合起羅郎。
但求脫粟三升飯。肯負眠雲六尺牀。洞雪成漿烹日鑄。
海苔為紙寫風將。舉頭便覺三山近。小大俱冥百慮忘。

七言絕句

凡八章

題送別圖

使星一點照閩垣
驛舍春濃酒易乾
官柳似知離別意
故將翠縷拂雕鞍

題隱居圖

樓臺倒影浸虛泓
嘉樹擎寒不盡青
何日過橋分半景
傍雲同築草玄亭

題長牧溪五燕圖

誰描乳燕落晴空
筆底能迴造化功
髣髴謝家池上見
柳絲烟暖水溶溶

題長白山居圖

滿地雲林稱隱居
燕泥污我讀殘書
五更風急鳥聲散
時有隔花來賣魚

題張子璿畫林泉幽趣圖

翩翩公子實仙才

天師之子

筆下雲泉潑翠開
若是人間逢

此景定應呼作小蓬萊

宜興強如心避地而歸
扁其居曰復初齋來徵

余詩 二首

昔日撓搶照五兵今時喜見泰階平
春風綠酒扶殘醉
斜立官橋聽早鶯

避地歸來景物遷
白烟涼草思淒然
摩挲為問庭前樹
不見蒼髯已十年

送葉明府之官郿縣

文章才子之官去
見說郿筒酒正釀
飲罷細觀循吏傳
莫緣山色憶芙蓉

哀王御史

并序

鄉先達監察御史王公餘慶字叔善仕元至正間赫赫有聲持節廣州卒且葬之矣後為亂兵所發三衢徐煥自韶移守是州而東陽趙侃方知印廣東行中書於是合謀改葬城東悟勝寺之原寔洪武庚戌三月三日也予因從侃請大篆其爵位姓字刻之墓門復為詩哀之哀之所以歎鄉學之凋謝而斯文之無係也煥字炳文侃字希貢皆義士云詩曰

剪紙難招御史魂蠻烟瘴雨但空墳縱然有石題新篆

誰守揚雄死後文

四五言長短句

猗歟詩

有序

猗歟美君子也君子謂奉常吳鎮卿鎮卿蚤以文顯使於金源不辱君命故作是詩也

猗歟君子在括之陽餐然其章有玉其相厥聲孔揚聲之伊何如巖之嵯嵯不虧不頗屹立而弗阿塞庭遠而其勢綿如酣如連如貪噬我中區君子揚揚為天子使

誕敷皇靈以警其類彼何人斯是繫是維不虞其無知
彼何人斯是維是繫不恤其無拂我金其躬我赤其衷
我節之崇以迄於終皦爾之行孰能尤之真爾之剛孰
能柔之游麟之冲冲兮鳴鳳之嗶嗶兮我思君子維邦
之容兮 猗歟九章六章四句二章章三句一章五句
予謂作詩必本於三百篇自李陵專於五言歷代因
之鮮有復於古者晉魏之間雖有作者音節韻趣亦
有難於言矣方與劉先生伯溫同倡千古之絕學適

吳從善以其遠祖墓銘求題欣然援筆賦之從善有文而又能不忘乎先如此其亦賢子孫也哉

雲窩軒詩

并序

龍虎山鍊師張君仲毓嗜學而攻詩尤善鼓琴嘗汗漫遊於湖江自謂若白雲出入空谷杳無定蹤遂以雲窩名其軒命弟子上官若冲來請余言夫膚寸而起倏然暴乎太虛者雲也英英份份資一氣之流行固凝而聚矣已而飄忽乎東西歛跡藏形類若不知所之此無他

雲無心也方外有道之士茹木餐霞捐去塵俗之累翩
翩然御風而遊玄間來無所繫去無所繫絕如雲之寓
乎太空此無他亦無心也仲輒取寓雲以名軒不亦宜
乎予聞至人不物夫物然後能齊於物仲輒自比於雲
善矣而未免物於雲也物於雲則有礙有礙則不虛不
虛則靈明不通矣我不為靜而動何形焉我不為動而
靜何容焉是則動靜一如也我不為雲則夫卷也孰從
而舒之舒也孰從而卷之是則卷舒亦一如也仲輒試

澄心默坐存神於鬱羅蕭臺間冲漠無朕而萬象森列
其中而吾神未嘗形也未嘗形而雲果孰寓乎予當約
仲毓遊金庭委羽之墟勺松華泉擘麟脯而食之且請
仲毓出琴彈白雲之詩琴調清越羣仙或有駭驚來聽
者矣寓雲與否非所敢知其詩曰

雲溶溶兮無根倏聚忽散兮不知其門變化罔測兮契
乎道真龍虎名區兮列仙之倫剪雲製衣兮結雲以為
神超然高潔兮日與雲而相隣步虛九天上兮不沾世

氛水火交媾兮日月吐吞雲兮雲兮予寓爾以終其身

五七言長短句

凡四章

蛟門春曉圖歌

并序

句章王君景行嗜學好修之君子也其所居曰蛟門正

臨大海巨濤舂撞頃刻萬變平旦東望霞光燭天紅日

大如筴

想里切
竹器也

冉冉上升誠海東第一偉觀也王高士

叔明為作蛟門春曉圖景行出以示予使人飄飄然有

凌三山跨十洲之意故為賦長歌一篇而於神仙之事

獨多云其辭曰

瀛海無垠波濤吐吞涵浴日月叅契鬼神怪山如雲自
天墜萬丈壁立蛟為門南有金雞之俯啄北有猛虎之
雄蹲值獰飈兮奮揚東怒潮兮騰奔擲玉毬兮干霄灑
輕霧兮飛塵雪山冰崖之可怖可愕兮帆檣簸蕩不可
遏恍疑下上於星辰晨雞一鳴海色白層霞絢彩光如
璫縱橫閃鑠縛不定海神推上黃金盆靈境飄搖在世
外髣髴直至扶桑村何人結屋於其間云是甬東才子

開瓊闕雲間吹簫雙鶴下坐聆環佩聲珊珊有時共談
三十六洞之秘笈綠文赤字可以鑄蒼頑猿拾花兮春
片魚泳畫兮晴灣日媚嫣紅桃點點風入涼翠松翻翻
中襟濯盡萬斛之黃埃兮不知聲利是何物便思紫府
躋真班黃鶴山人列仙儒九霞為冠青綃裾手提五色
珊瑚株幻出一幅真形圖令人毛骨動颯爽思乘灝氣
超清都清都中有十二樓往來盡入瓊姬儔金符玉節
錦臂繡白台度曲彈箜篌雙成按拍歌莫愁我愁正孤

絕我興欲飛越矯首東望神光發蓬壺春殘瑤草殷麟
洲芝生翠環結我愛仙人萼綠華面如蓮花雙鬢鴉幾
年相期飯胡麻至今不來雲路遐何須龍虎鼎中求丹
砂何須天河穩泛牛斗槎但令坎離交媾翻三車氣毋
不動生黃芽我賦蛟門歌細看銅狄時摩娑長繩孰為
羈羲娥白石應泐金還磨不學長生將奈何不學長生
將奈何

東雒山房詩

并序

東雒山房者上清羽客周君雒之隱居也雒字彥博而能文其先居伊雒之上故彥博以雒為名而又以東雒扁其居不忘乎本也蓋彥博之先南遷廣信者多歷年所矣雖然彥博學神仙之道者也他日披丹霞乘青鸞北升嵩高之顛而俯瞰舊鄉寧不重丁令威之所感乎金華宋濂賦游仙之歌使書山房之素壁云歌曰

東雒山人羽為衣腰懸寶劍光陸離超然乘天游曠蕩八極隨飈馳俯視嵩高三十六一一秀出紫金翠羽之

華芝中有少室八百六十丈顛倒元氣涵晨霏絳綠
毛仙濯足清泠淵見人不肯折腰拜手擲綠黍散作天
花旋天花旋舞連娟玉女從東來頭戴雲翹足跼蹐試
持秋帛擣寒石中夜靈響淒緊如霜絃不知龍穴有石
髓太乙月鼎將同煎勞生任飄忽誰復相留連天雞一
鳴天下白齊州九點凝青烟朝暉灑澗之靈泉夕漱伊
洛之寒川雖知城郭尚依舊華表鶴淚應千年大江東流
浴龍虎丹光掩月夜吞吐故鄉何處久不歸人間一笑

成今古三素雲高不可攀仰見羣仙出沒於其間勿使
明鏡凋朱顏顧我魁礪徒無由扣瓊闕我不能鼻息吹
虹霓頓挫萬物歸新題我不能白晝兀坐惜居諸時翻
枯竹除白魚但得三寸舌赤如蓮花淨於雪高談蕊珠
經旦夕聲不絕聲不絕造玄微芙蓉峯前金虎要人騎
山人當相求飛飛騰太微共持瑤華玉管凌雲吹

贈虎髯生詩

有序

至正壬辰春勾蔡張辰謂余曰虎髯生者白鳳山中人

也吳姓錢名頗有髯類虎髯人爭稱為虎髯生生自幼
有大志讀書不為章句大義通而已作詩出奇語驚人
至壯氣愈高岸忽無所憚不事事與世多不合常慕古
豪傑為人遇邑中大繇役陰以兵法部勒見高山大澤
便指畫為扞禦之規鄉里小兒衆相揶揄之先達士則
曰此固狂生可進有為者也然以禮自守為順子為悌
弟悉無慚色尤善近師友道在是不復計其年之崇卑
便折節相尊事以故士類稍歸之時中原兵動東郡李

侯辟為行軍司馬使者凡再返生送使者曰為予謝李將軍方天下多故莫府得十倍才功猶半之我素疎加以閭閻即偕使者去無益萬分豪幸勿復來明當入深山矣無幾有言生於行丞相府丞相屬以徼巡之職且召與語生自度丞相決不用其言乃不受更製竹皮冠服大布衣以自隱暇日窅窅然行松風中遇酒輒飲飲少亦醉醉便擊節自歌人莫識其所存何如也辰既為之傳生聞先生以文章名欲求一詩以自張幸勿為生

靳予笑謂辰曰有是哉雖然辰不妄人也其言良信援
毫賦虎髯生詩詩曰


虎髯生鐵鑄形金鑄聲雙睛閃爍如怒鷹東飛欲盡三
韓地西飛要絕康居城刺刺論世事滿口吐甲兵於焉
梲長圖於焉建交營地聯大牙霜月苦天控虎口露雲
冥若笑我言狂我醉勿復醒十萬生靈定蠶粉夜半鬼
燐燒空青南方大諸侯聞之心膽驚便遣使者持弓旌
招之至麾下洩此氣崢嶸生出謝使者人言慎勿聽逃

入積翠巢峻嶒身衣鹿皮明首冠竹籜撐窵窵起向松
風行虎髯生狂似李麓似彭何不執取紅氍丈二鎗_叶
塞旗斬將聲裕裕

鑷白髮二首

白髮如青草剪已竟還生草青能變白髮白不復青人
生須知會有盡紫馬馱錢沽酒傾

昨日花如繡今朝花作塵人身一如花何為長苦辛古
今富貴皆黃土唯有青山解笑人



文憲集卷三十二